

**Nzaelwapx-krbz Jiszs Mz Jon
Da Kcng Tqyc-kapq-pnzng
Natq Ngr Nzaplxtqngr Mz
Nzaelwapx-krbz Jiszs Mz Jon
Da Kcng Tqyc-kapq-pnzng**

Mc ‘Natq Ngr Nzaplxtqngr Mz Nrpakxmrlz Kx Yr Jon.’ Yrle buk lc mz mzlir yiz 90—97 AD mz nibr Nrpakxmrlz. Aposol Jon yrbzle letz lc mz dzbe lrmakxtr kcng rlimz mz provins kc Esia, tzmnczbzng mz nzaclve-krde, murde pibz Jiszs bade mz nzobq-rmwiblengr. Suti drtwrde nzapqtr-krbzle nabz leplz mz nztu-amqngi-krdr mz mzli r nzakxpungr. Murde nzxplrkr Gct myaszpxle nzxplrkr Setzn, x sa naovxio-atwrnr-ngrde Setzn badr enqmi r Gct amrlx, mzli kc nakrlz-zpwx-ngrbzle mzli kc tqyrlq Gct.

Mz nzobq-rmwible-krde lcng, Jiszs aelwapx-ngrbzle mz Jon kzdung da kx naprtzng, mz nzymne-ebzpxngr kxkqlu. Kxnzrlxngiting drtwrdr tresz'tiu mz drtwr ngr kzdung da mz buk lc, murde rblx nzrkrlzng. A' kzdung da nzopx-angidrng. Mz nzmu-krde lcde, kzdung mzli yokaetipxkr drtwr ngrdr, x kzdung mzli trtingr. Dckrlzdeng 17-18, nzymnetr-ngrdr gzpman kxdrka'ngr kc navzm na-aclvele nrlc atwrnrngr. Gzpman lc apule srlx, murde batrpzle mz leplz nzrlasz-krdr Gct x nzvz-nqblq-krdr nqmqrde kxtrka. X nzyrlq drtqde “Bxbilon” nqmqr

krde lc tqtrka. Murde mzli kc bqnc, lr Bxbilon nzaovxiolr lr Jiu x nzbatrplzlr badr nzngini-krdr kxnzawz-nrbalqng. X nzbatr-kzplzlr nzangio-krdr gct ngrdrng, da kc tqwai nzmc-krule mz Buk sc Daniel. A' mz buk lc, Bxbilon drtwr ngrde gzpman ngr Rom mz mzli nyz Jon. X drtwr ngrde kz kx gzpman kx na-apule Rom sa navzm. X mz gzpman lc, Enqmi Kxetu ngr Kraes sa na-clve-atwrnr-ngrde nrlc. Nzrpi-ngrbz "Mrlx Kc Tqdrka'ngr Kc Kai."

Jon yr-kzle kzdung nabz kx nzngr-ngrdr Heven. Nabz lcngr amrlx nangr-ngrgu mz #123 mz Buk Ngr Nzangiongr.

Jiszs Kxnzmcpx Myapxbz Mz Buk Lc

Aelwapx-ngrde zluli rde. [*dckrlzde 1*]

Aclevele dzbe lrmakxtr nedeng mz nrlc. [*2—3*]

Nide Nei Sip kc tznibq x lu-mop, x nzangio kxnzrlxngiting amrlx. [*4—5*]

Nzayrplapxngr amrlx mz yiz kcng rlimz tzipibz Mzli r Nzfxpungr Kxtrka-zlwz. [*6—19*]

Jiszs yzlu-mou-ngrmle mz Jerusalem kxmrna, murde na-clvele nrlc mz nzngini-krde King r king amrlx. [*19—22*]

¹ Ninge Jon, kxnzawz ne Jiszs. Krlcng da kx naprtlzng kx aelwa-ngrm Jiszs bange. Rlr-ngrbz Gct mz Jiszs da lcngr tqycpe pipz nzprt-krmlr, mz nzvz-nqblq-krde me pnz drtwrde, murde na-aelwa-ngrbzle mz kxnzawz nedeng. X Jiszs atwzlr-ngrmle dq enjrl nede bange, murde nayokaetipxmle bange drtwr ngr da lcdeng.

² Mz nzmu-krde lcde, sc tqyropex da amrlx kcnq tqmcxng x tqxlrng. Krlcng natq Gct x nrpa angidr ngr Jiszsz Kxnzmcpix.

³ Namrlzbx mz doa kx rlwxpxle natq lcnq tqyrox mz buk lc. X namrlz-kzpz mz leplz kcnq tzxlrlr x tzyrlq-angidrlr natq lcnq. Murde sa nakrlz-angidrlr da lcnq amrlx mzli kc tqycpe pipz nzprt-zkrmlr.

Jon Ryrbz Mz Dzbe Lrmakxtr Mz Taon Rlimz Mz Esia Provins

⁴⁻⁵ Ninge Jon, ryrbo bamu nimu dzbe lrmakxtr kcnq mz taon rlimz mz Esia Provins.

Krka'-ngrne kx zmrlzcxmyalz x nzmnc-zpwxngr na-avzom Gct, Mqngrkxtr x Jiszsz Kxnzmcpix bamu. Gct kc tqmnc mzli ka, x tqmnc zvz, x sa navzm. X Mqngrkxtr kc tqmnc mz tron kc tqwxbungr Gct x nzwz-krdeng kcnq rlimz. X Jiszsz Kxnzmcpix kc tqrpipix angidr natq Gct, x doa kx nzatulz-kaip mz nzbzng, a' trpengr nzbz-krde. X nide kc tqaclvele king amrlx mz nrlc tulvzo. ✧

Jiszsz Kxnzmcpix lc mrlzti-zvzle nigu, x aopxpebzle drtqgu mz zmatq ngr alwx rgung mz nzbzokrmle mz kros.

⁶ X ata-lxblrlrle nigu mz dzbede kc esz', murde nawztrpzku mz Gct Trtede, kc tqngi King rgu, mz nznngini-krqu pris nedeng. Takitrde nzglqlz-zvzng, nide mz nzetukr zmatq ngrde, kc tqvzpe tqvzpe. Eu, angida. ✧

✧ **1:4-5** Sam 89:27; Nzyrplapxngr 14:5, 25; Jeremae 42:5; Rom 8:29; 1 Korint 15:20-22; Filipae 2:9-11; Kolosia 1:18; Hibru 12:23; Nzaelwapxngr 17:14; 19:16 ✧ **1:6** Nzrlaszng 19:6; Asaea 61:6; 1 Pita 2:5, 9; Rom 12:1; Hibru 13:15

⁷ Jiszs sa navzom natuom mz dcbz. X sa namc leplz amrlx ngr nrlc tulvzo, nidr badr leplz kcng tzbatrpnzng nzrluplxtingr nrkrdrdq Jiszs mzli kc. X leplz amrlx mz nrlc sa namwxlrng x nayrni-zlwzng. Me tutr-ngrde lape! Eu, angida. ✧

⁸ Rpi Yawe kx, “Ninge Gct kc tqrninr, kc tqmnc mzli ka, x tqmnc zvz, x sa navzm. Ninge nou da amrlx x kx ayrkrpx da amrlx.” ✧

Jiszs Kxnmcpx Opx Mz Mz Jon Apule Mrlx Leplz

⁹ Ninge Jon, x prtrku mz dzbede kc esz' mz nztu-amqngi-krqu kxmule-esz' nzaetqgbz drtqgu murde mnczbzku mz Jiszs mz nzngini-krde King rgu. Nzadwatrlr ninge presin mz trmctu Patmos, murde yapwxtipx-zvzx natq Gct x Nrpa ngr Jiszs.

¹⁰ Mz kzdq Sade mrlc, zmatq ngr Mqngkrxtr prsrle ninge, x obq-rmwiblex. Mzli lcdepwz xlrkixle mz nibrnge kzdq natq Kraes kxetu apule nzyrnkr trpu.

¹¹ Rpile kx, “Yro mz buk da amrlx mcqng, x atwzlr-ngrbz buk lcde mz Esia Provins mz dzbe lrmakxtr mz taon rlimz seleng: Efiszs, Simrnz, Prgamzm, Taeatira, Sadis, Filadelfia x Laodisea.”

¹² Kx lxlvrkimc kc mq mz nzmc-krnge kc tqy-cmnem bange, mcx da rlimz kx ngi gol kxwxbuo-ngrm lam. ✧

✧ **1:7** Daniel 7:13; Sekaraea 12:10-11; Matiu 24:30; Jon 19:37; 1 Tesalonika 4:17 ✧ **1:8** Nzrlaszng 3:14; Asaea 44:6; 48:12; Nzaelwapxngr 1:8, 17; 2:8; 21:6; 22:13 ✧ **1:12** Sekaraea 4:2-6

13 X mz mzlirdr, kzdq ncblo, kx apule Mrlx Leplz, kq nzkg kxboi, x lunyao-ngrde kc da kx apule gol. ✧

14 Nqngi narde prkitxpx apule nqbya ngr nrc. X mzte nzapulr nalzpq nyr. ✧

15 X nanycde kz nzapulr nzpnaprkr bras kc tzayleni mz nyr x sc tzalqtipe. X nzokr natqde apule nzyrpukr nrc. ✧

16 X malele mz mqde kxrte vri rlimz, x lvcpxm mz naode kc toki r vea kxmalc nrlarde rlilr, x nzyzlrkr rtrlmzte apule nzlulkr nepi mzli kc bea. ✧

17 Kx mcx kc nide, rtco-lzbq-ngrbo mz nanycde apux ncblo kx bz, mz nzangio-krnge nide. A' mqde kxrte bxtrole ninge x rpimle bange kx, "Bzkg mwxlrg. Ninge kx rtwayz x ninge kx rmnr-ngrbz. ✧

18 Ninge nou nzlungr. Bzx mzli kc ena, a' nzlupe-mou-krmc lc mzli ka tqvzpe tqvzpe. Lolvzx zmatq ngr nzrlvxngr x nzrbqtrngr naonrx ngr mrnyz mqngr leplz kxnbzpeng. ✧

19 Yro da keng tqmcqng, tqprtilzng mzli ka, x da keng naprtilzng mz nibrde.

20 Drtwr ngr vri lcng rlimz tqmalex mz mqnge kxrte x da rlimz kx ngi gol kxwxbuo-ngrm lam nidr sele. Vri keng rlimz drtwr ngrdr kxnzaclvelr

✧ **1:13** Daniel 7:13; 10:5 ✧ **1:14** Daniel 7:9 ✧ **1:15** Esikel 1:7, 24; 43:2; Daniel 10:6 ✧ **1:16** Asaea 11:4; 49:2; 60:1; Daniel 10:6; Malakai 4:2; Matiu 13:43; 17:2; Efisz 6:17; Hibru 4:12 ✧ **1:17** Asaea 44:6; 48:12; Nzrlaszng 33:20; Asaea 6:5; Esikel 1:28; 3:23; 43:3; 44:4; Daniel 8:17-18; 10:7-10; Matiu 17:7; Aposol 9:3-4; Nzaelwapxngr 1:8; 2:8; 21:6; 22:13 ✧ **1:18** Matiu 16:16; Jon 1:1-3; 6:57; 14:6; Hibru 2:14; 3:12; 9:14; 10:31; 12:22

dzbe lrmakxtr mz taon kcng rlimz, x da rlimz kx ngi gol kxwxbuo-ngrm lam, drtwr ngrdr dzbe lrmakxtr mz taon lcng rlimz.”

2

Letz Nangi Sc Dzbe Lrmakxtr Kc Efisz

¹ Jisz sc tqycnmem bange, mz nznngini-krde ncblo kc tqapule Mrlx Lepz. Rpi-mople kx nayrbz dq natq mz kxacivele dzbe lrmakxtr kc mz taon kxetu Efisz. Rpibzle kx,

“Krlcng natqng, ninge kc tqrmale vri kcng rlimz mz mqnge kxrtc x ninge kc tqayox mz mzlir da rlimz kx ngi gol kxwxbuo-ngrm lam.

² Krlzpex nqm q krmu, nimu lr Efisz. Wz-katoamu x tu-amqngi-zvzamu mz nzvz-nqblq-krmamu ninge. Krlz-kzx kx pxtxpx-ngrnamu leplz kcng nqm q krdr tqtrka. X obqplxtrpeamu ncblo kcng tzrpilr nidr kxznakrlzng ne Kraes, a' trtingr. X rmctitrpzmu kx nzpokiang, x nqm q krdr rngidrlvz-ngrbzmu mz leplz kx bzkq nzvz-nqblqlr.

³ Krlzx nztu-amqngi-zvz-krmu mz nrlarde nyznge. X kxmule-esz' nzatrkatilr nimu, a' nzrlxngiti-krmu trbaou mz nzvz-nqblq-krmu ninge.

⁴⁻⁶ Eu, x mrlz kz nzpxtxpx-krmu nqm q kr leplz kcng tzvz-nqblqlr nzalvztrkr Nikolas, da kc tqwai-kzx mz nzpxtxpx-krngele.

“A' da kx trmrlztr-ngrpwzu drtwrnge bamu nide sele. Trmrlzti-lzbqpwamuu da kc tqwaisr-lzbq-ngrnamu mzli kc tqlxngiti-ate-ngrnamu ninge. Nadcpz zvz mz drtwrmu

mrkc tqesakingɾ nzvz-rbr-krmu. Drtwrmu nayzlum mz alwx ngrmung, x nqmɔ krmu na-apule mzli kc tqlxngiti-ate-ngrnamu ninge. Nzmu drtwrmu kx tryzlupeu, ninge la navzmc bamu x nakatxx dzbe lrmakxtr nyzmu mz nzmnc-krmamu bange, mz nzkatx-krnge da kx wxbuo-ngrm lam kc tqngi gol mrkc tqtulz-ngrmle mz mzlirmu. Murde trvz-nqblq-angidrpewamuu ninge. ✧

⁷ “Abzamu nzyrlq-angidr-krmu natq lɔng tqpibz Mqngɾkxtr mz dzbe lrmakxtr lɔng. Murde mrlx kx aovxiole mz nzvec-krdr badr zmatqng kxtrka, sa narlr-ngrbo bade nzngq-krde Nranc ngr Nzlungɾ Kxmrna kc tqtu Me Mncngɾ Gct.” ✧

Delape. Ninge *Jiszs*.

Letz Nangi Sc Dzbe Lrmakxtr Kc Simrnz

⁸ X Jiszs nzngini-krde ncblo kc tqapule Mrlx Leplz, rpi-mople bange kx nayr-kzpo dɔ natq mz kxacleve dzbe lrmakxtr kc mz taon Simrnz. Rpibzle kx,

“Krlɔng natqngɛ, ninge kxrtwayz x kxrmnr-ngrbz, ninge kc tqbz mzli kc ena, a' mzli ka lupe-mopwc'.” ✧

⁹ Krlzpɛx nzetqkr drtqmu, nimu lr Simrnz. X kxmule-esz' tr-rngiscmuu trau, a' mz nr-larde nyz Gct nginimu kz bcnyr angidr mz nzrlxngiti-krmu. Krlzpe-kzx nzrpikitikɾ leplz kcng tztulrtr-lzbq-ngrdr nzngini-krdr lr Jiu. A'

✧ **2:4-6** Matiu 24:12 ✧ **2:7** Nou 2:9; Nzaelwapxngɾ 22:2 ✧ **2:8** Asaea 44:6; 48:12; Nzaelwapxngɾ 1:8, 17; 21:6

trnzngini-angidru leplz kcong tqmcpxng Gct, murde nidr dzbede kc tzangioldr Setzn. ☆

¹⁰ Bzkq mwxlramu mz da trka naprtilzbzng bamu. Kzdg la mzli, enqmi rmung sa nalolvzlr nimu x na-adwatrlr nimu mz presin mz nz-abzpxngr nzrlxngiti-krmu, murde nzvz-nqblqlr drtwr Setzn. X naetqti drtqmu zbq nzpnu naesz'. A' abrtrpa'mu drtwrmu bange, kxmuleesz' nznibqlr nimu. Murde mz nibrde, sa nakabo bamu nzlungr kxmrna, nangi da kxmrlz kx vzpxm mz nzrlxngiti-krmu.

¹¹ “Abzamu nzyrlq-angidr-krmu natq lcong tqpibz Mqngrkxtr mz dzbe lrmakxtr lcong. Murde krkcong tzaovxiong mz nzvec-krdr badr zmatqng kxtrka, trnabzpeung mz nzbzng kxrmnr-ngrm mzli kc Gct na-ayrplapx-ngrde lr nrlc kcong tzvz-rbrng.” ☆

Delape. Ninge *Jiszs*.

Letz Nangi Sc Dzbe Lrmakxtr Kc Prgamzm

¹² X Jiszs nznngini-krde ncblo kc tqapule Mrlx Leplz rpi-mople bange kx nayr-kzpo dq natq mz kxaclevele dzbe lrmakxtr kc mz taon Prgamzm. Rpibzle kx,

“Krlcong natqngge, ninge kc tqrngisc toki r vea kxmalc nrlarde rlilr.

¹³ Krlzx mrla tqmnc-ngrnamu mrkc tqacleve Setzn. A' nimu lr Prgamzm vz-nqblq-angidramu ninge, x abrtr-angidramu drtwrmu bange. Trmwxlrwamuu nzpipx-krmu nzabrtr-krmamu drtwrmu bange,

☆ **2:9** Jon 8:44-47; Rom 2:28-29; Filipae 3:3 ☆ **2:11** Nzaelwapxngr 20:14; 21:8

kxmule-esz' Antipas nznibq mz taon nyzmu kc tqaclve Setzn. Antipas lc aelwa-ngrbzle vz-nqblqlle ninge mz nzymne-krde x nzale-krde da.

¹⁴ "A' da kxpipz kx trmrlztr-ngrpwzu drtwrnge bamu nidr seleng. Kzdung nimu sc tzvz-nqblqlr nzalvztrkr Profet Balam. Mzli kc bqnc alvztrle King Balak kc Moab nzesabrti-krde lr Israel murde nataong mz alwx. X pibzle badr nzmukrdr dakxnzng kx ngi blz nzkabz mz mqngr drka' kxnzlx, x aprtrle nidr mz nzrmwimingr doa kx trngiu krnalzdr. X mzli ka kzdung nimu nzvz-nqblqlr nqm q krde. ✧

¹⁵ X kzdung nimu sc tzvz-nqblql-kzlr nzalvztrngr kxtrka sc dzbede ne Nikolas.

¹⁶ Tekqtramu nqm q krmu lcng tqtrka! Nzmu kx trtekqtrwamuu nqm q lcng, sa napwrkilvc-ngrnamu ninge mz nzota-krgr badr leplz lcng, mz toki r vea kc tqmalc nrlarde rlilr tqlvcpxm mz naonge.

¹⁷ "Abzamu nzyrlq-angidr-krmu natq lcng tqpibz Mqngrkxtr mz mz dzbe lrmakxtr lcng. Murde mrlx kx aovxio mz nzvec-krdr badr zmatqng kxtrka, sa nakabo bade dakxnzng nange kxmna kc tzrpibz 'mana kc tqyc-kapq.' X mz nzabrtzlvz-krnge nide sa naka-kzpo bade rplz kxprki kx yctrngr drtqde kxmna. X drtq kxmna lc, trgalr kxrkrlz, a' krlz txpwz ncblo kc tqrngisc rplz lcde." ✧

Delape. Ninge Jiszs.

Letz Nangi Sc Dzbe Lrmakxtr Kc Taetira

✧ **2:14** Nzkqlu-krdr 22:5, 7; 25:1-3; 31:16; Lou Kcpwz 23:4

✧ **2:17** Asaea 62:2; 65:15; Jon 6:48-50

18 X Jiszs nzungini-krde ncblo kc tqapule Mrlx Leplz rpi-mople kx nayr-kzpo dq natq mz kxaclevele dzbe lrmakxtr kc mz taon Taeatira. Rpibzle kx,

“Krlcng natqnge, ninge Mrlx Gct kc mzke' tqapule nalzpq nyr, x nanyonge apule bras kc tzalqtipe.

19 Krlzpex nqm̄q krmu, nimu lr Taeatira kx lxngiti-txpwzmu ninge. Murde sc tqvz zvz nzmrlzti-lzbq-krmu x nzokatr-etr-krmu. X krlz-kzx kx kxmule-esz' nzaetqbz drtqmu, a' tu-amqngi-lxblr-zvzamu. X aleamu da kx myaszpxpele mzli kc tqlxngiti-ate-ngrnamu ninge.

20 “A' da esz' kx trmrlztr-ngrpwzu drtwr̄nge bamu. Murde rlr-ngrbzmu mz olvz kc tqapule Jesebel kc bqnc, nzm̄ncbe-krbzle bamu mz nzapokiati-krde nimu kx nide profet ne Gct. Leplz nz̄kqlupeng kx ycp̄xpe nzalvztr-krde mz nzrpi-krbzle badr nzm̄wimi-abeane-krdr doa kx tr̄ngiu kr̄nalzdr x nzm̄u-krdr dak̄xnzng kx ngi blz nz̄kabz mz m̄qngr drka' k̄xnz̄lz. ☆

21 Kapebo mz olvz lc mzli r nz̄tekqtr-krde nqm̄q ngr drtwr̄de, a' p̄tx̄px-ngrde x sc tqvz zvz nzm̄wimi-abeane-krde doa kx tr̄ngiu kr̄nalzde.

22 Mz da lcng tq̄trka, sa na-am̄nc-zvzbo nide mz nelv̄q mz zyagox kx̄trka, nidr badr kr̄kcng tz̄pr̄tr̄peng mz alw̄x ngrde, nzm̄u kx tr̄nz̄tekq̄tr̄lr̄u nqm̄q nr drtwr̄dr.

23 X sa nam̄il̄tx̄xobo doa kcng tz̄vz-nq̄bl̄q-zvzlr nide. Murde k̄xnz̄rl̄x̄ngiting mz taon am̄rl̄x

☆ 2:20 1 King 16:31; 21:25-26; 2 King 9:22, 30

nakrlzlr kx *obqplxtix nabz leplz x nzvzkr nardr*. X sa na-ayzlu-ngrbo bamu mz nzvz-nqblq-krde da kx aleamu. ☆

²⁴⁻²⁵ “A’ kzdu nimu lr Taeatira trnzvz-nqblqlru nzalvztrkr Jesebel lc. X trprtrp-wzmuu mz da kc tzrpibz ‘da kx yc-kapq sc Setzn.’ X napibo bamu kx trtxpnzngnr natq mou kx nayrlqamu, a’ lolvz-amqngiamu nzlxngitikrmu ninge, da kc tqwai nzlolvz-zvz-krmule, navz navz mzli kx nayzlu-ngrmc.

²⁶⁻²⁷ Murde zmatq kcpwz tqkam Trtenge bange, sa nakabo mz mrlx kx aovxiole mz nzvec-krdr badr zmatqng kxtrka, x nzyrlq-angidr-krde natqngc navz navz nakrlzbzle nzyrkrpxkr nrlc. *X sa nakabo bade zmatq ngr nzaclvengr neidu amrlx mz nrlc tulvzo. Sa na-aovxiole mrnyzdr mz nzxplr-krde, kc na-apule bz kc tqrniglc botol.* ☆

²⁸ X mz nzaelwapxngr nzaovxio-krde, sa naka-kzpo bade paglxnrlc, kc tqngi rkx ngr zbq kxmrna nyz Gct. ☆

²⁹ “Abzamu nzyrlq-angidr-krmu natq lcng tqpibz Mqngrkxtr mz mz dzbe lrmakxtr lcng.” Delape. Ninge *Jiszs*.

3

Letz Nangi Sc Dzbe Lrmakxtr Kc Sadis

☆ **2:23** Job 34:33; Sam 7:9-10; 26:2; 62:12; 139:1; Nzyrplapxngr 24:12; Asaea 40:10; 59:18; 62:11; Jeremaea 17:10; Matiu 16:27; 25:31-46; Rom 2:6; 2 Korint 5:10; Galesia 6:7-8; 2 Timoti 4:14; Nzaelwapxngr 2:23; 20:13 ☆ **2:26-27** Sam 2:8-9; Asaea 30:14; Jeremaea 19:11; Nzaelwapxngr 12:5; 19:15 ☆ **2:28** Luk 1:78; 2 Pita 1:19; 1 Jon 3:2; Nzaelwapxngr 22:16

1-2 X Jiszs nzungini-krde ncblo kc tqapule Mrlx Leplz rpi-mople bange kx nayr-kzpo dq natq mz kxacivele dzbe lrmakxtr kc mz taon Sadis. Rpibzle kx,

“Krlcng natqngge, ninge kc tqrngine Mqngr ne Gct kc nzwz-krdeng rlimz x rngine kz vri kcing rlimz.

Krlzpepex nqm̄q krmu, nimu lr Sadis kx traktitrkaple mz nzobqkr Gct rnge. Nzrpilr kx lubeamu, a' trtingr, murde bz-angidrpeamu. Dwalzmamu! Axplrtiamu nzlu-mqglq-krmu, murde ycpe pipz nzyrkrtxpx-krbzle. ✧

3 Mzpu naobqpx zvz x natekqtramu nqm̄q ngr drtwrmu. Murde ma tqprkilvc-ngrnamu ninge nzapu-krnge ncblo kxpnada. Trnakrlzwamuu mzli kc navz-ngrmc. Bzq̄q mrbrtr mz drtwrmu da kcing tqmrlz tzpibz bamu x tqxlramu. X yrlq-angidramu natq l̄cng. ✧

4 “A' nimu kxpipz mrkc Sadis kx lrpz scdr trblq̄kiu, sa nakqamu lrpz kxprki mzli kc navz-lxblr-ngrgu murde takitrde nimu.

5 “Mrlx kx aovxiole nzvec-krdr badr zmatqng kxtrka, sa nakq lrpz kxprki na-apule lr Sadis lcdeng, x trnakapxpw̄c'u drtqde mz Buk ngr Nzlungr. A' napipxbo mz Trtenge x enjrl nedeng kx ni-angidrde doa nenge. ✧

6 “Abzamu nzyrlq-angidr-krmu natq l̄cng tq̄pibz Mqngrkxtr mz mz dzbe lrmakxtr l̄cng.”
Delape. Ninge Jiszs.

✧ 3:1-2 Nzaelwapxngr 1:4-5, 16 ✧ 3:3 Matiu 24:42-44; Mak 13:33-37; Luk 12:39-40; 1 Tesalonika 5:2-4; 2 Pita 3:10; Nzaelwapxngr 16:15 ✧ 3:5 Nzrlaszng 32:32-33; Sam 69:28; Matiu 10:32; Luk 12:8; Nzaelwapxngr 20:12

Letz Nangi Sc Dzbe Lrmakxtr Kc Filadelfia

⁷ X ncblo kc tqapule Mrlx Leplz rpi-mople bange kx nayr-kzpo dq natq mz kxacivele dzbe lrmakxtr kc mz taon Filadelfia. Rpibzle kx,

“Krlcng natqngge, ninge kc tqtr-esz'ngr x tqngi da angidr. Lolvzx ki sc King Devet, kc drtwr ngrde kx rngiscnge zmatq ngr nzrlvxngr naonrx kx trpnzng kx rkrlz nzrbqng, x zmatq ngr nzrbqng naonrx kx trpnzng kx rkrlz nzrlvxngr. ✧

⁸ Krlzpx nqm q krmu, nimu lr Filadelfia. Kxmule-esz' trnipwamuu kxnetung, a' yrlq-angidramu natqngge x trtxpnzng nzrpi-krmu kx trkrlzwamuu ninge. Delc, naonrx se tqlvpxbo bamu, naonrx kx trpnzng kx rkrlz nzrbqtrng.

⁹ “Lalzqmmamu bange. Dzbe leplz kcng tzangiold Setzn tzrpilr nidr lr Jiu, a' nzpokia-ngrdr. Sa navzmimc nidr mz nzavzo-lzbq-krbzlr bamu, murde nakrlzlr kx mrlzti-zlwzx nimu. ✧

¹⁰ X sa na-arlapxbo nimu mz da kcng tqtrka naprtzbx mz leplz amrlx mz nrlc mz nzayrplapxng nidr, murde mz nzyrlq-angidr-krmu natqngge, tu-amqngi-zvzamu kxmule-esz' nzaetqbx drtqmu. ✧

¹¹ Mzli trnzboi-krdeu x sa nayzlupe-mopwc'. ✧ Lolvz-amqngiamu nzlxngiti-krmu ninge murde ma tzangqngutilr, x sc tr-rtwzpewamuu da kxmrlz mz nzaovxio-krmu mz nzvecng.

✧ **3:7** Job 12:14; Asaea 22:22; 40:25; Habakuk 3:3; Mak 1:24; Jon 6:69 ✧ **3:9** Asaea 45:14; 60:14 ✧ **3:10** Matiu 10:22; 24:13; Mak 13:13; Rom 2:7; 1 Timoti 4:16; 2 Timoti 2:10-12; Hibru 10:36; Jemes 1:12 ✧ **3:11** Nzaelwapxng 22:7

12 “Murde mrlx kx aovxio mz nzvec-krdr badr zmatqng kxtrka, nide kx navzmibo mz Gct rnge na-apule nctrpou ngr Mangr-nzangiongr kxmrna, x trtxpengr nzdwasz-krdele. X nayrtrpo bade drtq kxmrna lcde seng tq. Drtq kx ayrnrngr drtq mzteadau nyz Gct, Jerusalem kxmrna kc tqvzom Heven. Murde Jerusalem kxmrna nangi mrnyzde. X drtq krali drtq Gct rnge, murde nide doa ne Gct. X drtq kratq drtqng kxmrna, murde ni-kzde doa nenge. ✧

13 “Abzamu nzyrlq-angidr-krmu natq lcng tqpibz Mqngrkxtr mz mz dzbe lrmakxtr lcng.”
Delape. Ninge Jiszs.

Letz Nangi Sc Dzbe Lrmakxtr Kc Laodisea

14 X Jiszs nznngini-krde ncblo kc tqapule Mrlx Leplz rpi-mople bange kx nayr-kzpo dq natq mz kxacivele dzbe lrmakxtr kc mz taon Laodisea. Natq lc nide sele.

“Krlcng natqng, ninge kc tqapux natq lc tqngi ‘angida’ murde ninge kc tqrngi-batrpz da amrlx mz nzvz-nqblq-krde me pnz drtwr Gct. X ni-kzng ncblo angidr kc tqrpipx-angidrpe natqdeng. X ninge nou da amrlx kcng tqwzng Gct. ✧

15 Krlzpex nqmq krmu. Krlzx kx trvz-nqblqwamuu ninge mz drtwr kxpq o drtwr kxbao. A' na-aoti drtwrmu me navz-nqblqkiamule, murde drtwrmu napqtrpz o nabaotrpz. Bzkq drtwrmu li.

16 A' mz nznngini-krmu ncte lxbler mz da amrlx x pq-lrpiamu, sa nabyapx-ngrne nimu na-apule lue kxtrka.

17 "Rpiamu kx nimu bcnyrng, x rngiscpemu da amrlx kcng tqsutu drtwrmu. A' trkrlzwa-muu kx mz nrlarde nyz mqngrmu x nabzmu tatxpxamu mz da amrlx mzli ka. Mz nzobqkr Gct, nimu leplz kxdrka'ngr, kxnzyc mz drtwr, kxtrnzrngiscung, kx mzpu mwi x yclqamu.

18 Rlr-ngrmamu bange nzka-krbo bamu da kx na-atubqtile nimu mz nzobqkr Gct. Rlr-ngrmamu bange nzxpe-krbo alwx ngrmu mz nzbz-krnge, na-apule kx xpeamu gol. Delc nangunimu bcnyr angidr mz nzrmcti-krmu nzlungr kxboi. X apxitr-lzbq-ngnamu lrpzng kxprki ngr nztubq-esz'ngr-krnge, murde drtqmu ma tqmya mzli kc navz-ngrmc. Murde mzli lc naoliqti-angidramu ninge. X rlr-ngrmamu bange nzaelwa-lzbq-krbo bamu, murde nakrlz-angidramu ninge na-apule luekxpiz kx ngi tolo kx nakitramu mz mzpu mz nzobq-angidr-krmu.

19 Krkcng tqmrlzti-zlwzxng krlzx nzlclvz-krbo badr da, x nzayrplapxngr nidr. Mz nzmukrde lcde, drtwrmu nayzlu, x napqtitr drtwrmu ninge. ☆

20 Murde ninge la tqtutrp yz mz naonrx nyzmu, tqabctrpo mz nzaenzli-krnge nzvzmitr-krmu ninge. Doa kx xlrle natqng x lvxpxmle naonrx bange, sa nadwatropo ma nyzde mz nzmukrbl-krgr ncd.

21 "Mrlx kx aovxio mz nzvec-krdr badr zmatqng kxtrka, sa na-awxbuox nide mz tron mz

☆ 3:19 Nzyrplapxngr 3:12; Hibiru 12:6

nzwxbu-krgr badr mz nzaclvengr. Da kc tqwaix mz nzaovxio-krnge mz nzvec-krgr badr zmatqng kxtrka, x wxbupekr ncdr Trtenge mz nzaclvengr.

²² “Abzamu nzyrlq-angidr-krmu natq lcngr tqpibz Mqngrkxtr mz mz dzbe lrmakxtr lcngr.”
Delape. Ninge *Jiszs*.

4

Jon Mcle Nzangiongr Gct Heven

¹ Mz nibr nzxlr-krnge letz lcngr, obq-rmwible-moux x opx mz mzke' kc naonrx kx obq Heven. X sc tqxlr-moux natq Kraes kc etu tqapule nzyrnigr trpu, tqycmne-kaip ena bange. X rpi-mople kx, “Vdzdm mrka, murde na-aelwa-ngrbo bam da kx naprtilzmqng mzli lc navzm.”

² X mzli lcpwz, Mqngrkxtr sc tqprsrpe-moule ninge. X mcx kc tron Heven, x wxbuom kc Kxetu elr. ✧

³ X Kxetu kc tqwxbuom mz tron lcde, mzte apule nzyaglqkr rplz kx opx, x nzpnaprkr rplz kxpc. X o-ngalelvzle tron nrpc' kx nilz rde apule rplz kx mqbq.

⁴ X mc-kzx tron nzpnu-li-nrade-pwx (24) nztu-ngalelvzlr tron nyzde, x kxnzaclveng nzpnu-li-nrade-pwx nzwxbuomqng elr, nzqk-lxblrng lrpz kxprki, x nzabx-lxblrng mz kraon kx ngi gol.

⁵ X mclz-kzx nzaglpz'tikr bzlrpc x xlrlzx nzyr-putipxkr bzlrmei mz tron. X mrkc tqxlvrkipx tron woutrpz elr lam rlimz, rkx ngr Mqngrkxtr ne Gct kc nzwz-krdenr rlimz. ✧

✧ **4:2** Asaea 6:1; Esikel 1:26-28; 10:1 ✧ **4:5** Nzrlaszng 19:16; Esikel 1:13; Sekaraea 4:2

⁶ X yctr-kzpz kc elr da kx apule prla kx ngi dzipq kx otxpx. ✧ X nztu-ngalelvzlr nrlar tron kcng pwx krkcng tzlung kcng pwx. X mztr kqlu kxnzobqpx-kaing x kxnzobqpxng mq.

⁷ X krkcng tzlung, kx ayrrngr apule laion, krali apule nei kzu kxncblongr, kratq mzte apule mz ncblo, x krapwx apule lr kc tqlvcp.

⁸⁻¹⁰ Kxnzlung lcng pwx nabxdr esz'mz lxbllr, x nrkrdrtdr yrlwr-ngalelvz mztr x wai-kzle nabz nabxdrng. Nzglqlzlr x nzangioldr x nzawibzng mz Kxetu kc tqwxbuom mz tron, tqlu-zvzpe. X mz nrlckxngrlx x mz nrlckxbq tresakiu nzngkrdr kx,

“Yawe, Gct kc tqrninr,

Drtmq tr-esz'ngr.

Nimq kc tqmnc mzli ka,
X tqmnc zvz, x sa navzm.” ✧

X mzli ldepwz, kxnzavleng kcng nzpnuli-nrade-pwx nzwweobzng zpr mz Kxetu kc tqwxbuom mz tron, tqlu-zvzpe. Nzkaobzlr kraon ngr nardr mrkc tqxlvrkipx tron, x sc tzngrpeng.

¹¹ Nzrpibzlr kx,

“Yawe, nipem Gct rgr.

X takitrde nim

Nzrglqlzng, nzangiongr,

X nzrpixng zmatq ngrm.

Murde wz-ngrn doa amrlx,

X da amrlx mz nrlc.

X mz nzwz-krmqleng

Nzmnc-krdr x nzyc-krdr,

Nzvz-nqblqlr me pnz drtwrm.”

✧ **4:6** Esikel 1:5-10, 22; 10:14 ✧ **4:8-10** Esikel 1:18; 10:12; Asaea 6:2-3

5

Nei Sip Kc Heven

¹ Zbz mcx kc skrol kx apule lrpzu kxboi kxnzbu. X male Kxetu kc tqwxbuom mz tron mz mqde kxrtc. X skrol lc nzyr nrlarde rlilr. A' nzbupe x nzabli-kzo-ngrde nrlc rlimz mz kadol kx apule bq lr nounc. ✧

² X mcx kc enjrl kx matq-esz'ngr, x sc tqetumipe nate nzrpi-krde kx, “?Neke takitrde nzrniglcngr kadol lcng rlimz murde nakawxpxle skrol lc?”

³ A' trpnzngr kx nzrmcti Heven, mz nrlc, x mrnyz mqngr kxnzbpeng kx takitrde.

⁴ Sc tqyrnitx-zlwzpx.

⁵ A' kzdq kxnzaclve lcng rpimle bange kx, “Bzkq yrniq! Mcpwz! Laion ngr Neidu lr Judz. Ncblo kxmatq kc tqngi melrmqde King Devet, x aovxiopcle nzvecngr. Sa naniglcle kadol lcng rlimz murde narkawxpx skrol lc.” ✧

⁶ Zbz mcx kc Nei Sip tutrpz mrkc tqxlvrkipx tron, x kxnzlung kcng pwx x kxnzaclveng kcng nzpnu-li-nrade-pwx (24) nztu-ngalelvzlr nide. Nei Sip kc opxm kx nznibqpe. X tutrpz bade dxpa' rlimz kx ngi rkx ngr zmatq ngrde. X mzte rlimz kz, rkx ngr Mqngrkxtr ne Gct kc nzwz-krdeng rlimz, kx atwzlrpx-ngrde mz nrlc tulvzo. ✧

⁷ Nei Sip sc tqvzpebz mz Kxetu kc tqwxbuom mz tron x otibzle skrol kc tqmalele mz mqde kxrtc.

✧ **5:1** Esikel 2:9-10; Asaea 29:11 ✧ **5:5** Nou 49:9; Asaea 11:1, 10

✧ **5:6** Asaea 53:7; Sekaraea 3:9; 4:10

8 X mzli lcpwz, kxnzlung kcng pwx x kxn-
zACLveng kcng nzpnu-li-nrade-pwx nZrtco-lzbq-
ngrbZng mz Nei Sip nZglqpx-krdrle. X nZrtaplxs-
rng gita x dis kx ngi gol yrbu lxblr mz bqlr nc
ninz, krlcng nzkrka'kr leplz neng Gct. ✧

9-10 Zbz sc tzngr-ngrdr kc nabz kxmrna, mz
nZrpi-krdr kx,
“Nipem ncblo kx rtwz skrol la,
X takitrde nim,
Nzrniglcngr kadol ngrdeng
X nZrkawxpx-kzng.
Nim blz kx nznibqng.
Mepyr ngrm yrleo.
Xpetrle leplz neng Gct.
Leplz lcng nZprpxmqng mz nou, natq, drtc', x
Neidu amrlx mz nrlc. ✧

“Nim kx rvzmimqng leplz lcng amrlx,
Nidr kxnzprpxmqng
Mz nou, natq, x neidu, x drtc' amrlx
Mrka mz nrlc tulvzo,
Murde nangini-ngrdr
Pris neng Gct rgu,
Mz nzwztr-krbzlr bade.
X nidr kx na-ACLveng ncdR mz nrlc,
Mz nrlc tulvzo, eu.” ✧

11 Zbz obq-mopwc' x xlrX nzngrkr siu ngr zbo
ngr enjrl kx rblx nzrlwxngr. X enjrl lcng nZyrlwr-
ngalelvzlr tron, mrkc nzmnc-kzng kxnzlung kcng
pwx x kxnzACLveng kcng. ✧

12 X natr kc tqetupe mz nzngrngr kx,

✧ 5:8 Sam 141:2 ✧ 5:9-10 Sam 33:3; 98:1; Asaea 42:10 ✧ 5:9-10
NzrlaszngR 19:6 ✧ 5:11 Daniel 7:10

“Nimq Nei Sip kc tznibq,
 X takitrde nim
 Nzrpiwxngr zmatq ngrmq,
 Nzkriz-angidr-krm,
 Kx nim angidr bcnyr, x xplr-esz'ngrn.
 X takitrde nim kz
 Nzrglqlzng, nzangiongr,
 X nzrglqpxngr zvz.”

¹³ Zbz xlr-moux krkcng lu amrlx, kxmule-
 esz' Heven, mz nrlc, mrnyz mqngr kxnbzpeng,
 prla, x nrlc atwrnrngr, a' nzngrrp-xlblr-ngrdr mz
 nzrpi-krdr kx,

“Kxetu rgr, kc tqngi Nei Sipq,
 X Gct kc tqwxbuom mz tron,
 Naglqpxkr nimu, na-amatqkr nimu,
 Na-awi-ngrbzk bamu.
 X napipxkr zmatq ngrmu
 Kx myalz-esz'ngr.
 Me tutr-ngrde lape!
 Na-angiokr nimu, naglqlzkr nimu,
 Tqvzpe tqvzpe! Eu!”

¹⁴ X kxnlung kcng pwx nzrpibzlr kx, “Eu,
 angida!” X kxnzacvleng kcng nzrtco-lzbqng mz
 nzangiongr.

6

Hcsi Kxprki Drtwr Ngrde Nzaovxiongr

¹ Zbz mcx Nei Sip nzniglc-krde kadol ngr skrol
 kc kai. X xlrz nznexpx-zlwzkr kxnlung kc kai,
 x nate etu apule bzlrmei, rpile kx, “Vzm!”

² Obq-mopwc', x mcx kc hcsi kxprki, x mrlx kc
 tqwxbuom elr rmale popz' x nipna, x nzalaobz kc

kraon mz narde. ✧ Nzwxbuo-krmle kc mz hcsi apule ncblo kx aovxiope mz nzvecngr x naprpx mou mz nzaovxiongr mz kzdq kz nzvecngr.

Hcsi Kxpc Drtwr Ngrde Nzvecngr

³ Zbz mc-moux Nei Sip kc nzniglc-krde kadol krali, x xlr-kzx kxlu krali nzrpi-krde kx, “Vzm!”

⁴ Zbz vzpx-mop kc hcsi kxpc. Mrlx kc tqwxbuom elr nzkabz kc bade toki r vea kxetu x zmatq ngr nzrkatx-krde nrwz mz nrlc, murde na-apqtrpzle drtwr leplz mz nzota-krdr x nznibq-lzbq-krdr.

Hcsi Kxbotapz' Drtwr Ngrde Nztaokr Dzbi

⁵ Zbz Nei Sip kc niglc-kzle kadol kratq. X kxlu kratq rpi-kzle kx, “Vzm!” Obqbo x mcx vzpxm kc hcsi kxbotapz'. ✧ X ncblo kc tqvone elr adole mz mqde kc skel mz nzipix-krde narncbr ngr dakxnzng.

⁶ Zbz xlrx kc natq vzpxm mz mzlr kxnzung kcng pwx, rpibzle mz ncblo lc kx, “Rlr-ngrbo bam nzyrlq-krm narncbr kxlqlwx zlwz mz bxli r flawa wit kxes' o bxli r raes kxtq, murde vea kcng mz nrlc nzayctxdr nzpenger dakxnzng. A' bzkq odatiq nounc olivi x nqvi lr grep!”

Hcsi Kxkupyia Drtwr Ngrde Nzbzng

⁷ Zbz Nei Sip sc tqniglcpe-kzle kadol krapwx, x xlrbo kxlu krapwx rpi-kzle kx, “Vzm!”

⁸ Obqbo, x mcx vzpxm kzdq hcsi kxkupyia. ✧ X mrlx kc tqwxbuom elr, drtqde 'Nzbzng.' X mrlx kx drtqde 'Mrnyz Mqngr Kxnzbzpeng' vzbz mz

✧ **6:2** Sekaraea 1:8; 6:2-6 ✧ **6:5** Sekaraea 1:8; 6:2-6 ✧ **6:8** Sekaraea 1:8; 6:2-6; Esikel 14:21

nibrde. Gct rlr-ngrbzle badr zmatq ngr nznibqti-krdr leplz kxkqlu ngr nrlc mz vea, mz dzbi, mz zyagox, x mz animol kzpetong.

Nznibqkr Kxnzrlxngiting

⁹ Zbz niglc kz Nei Sip kc kadol kranzlvqn. Obqbo x mcx kc olta. X mz nabz olta lcde, mcx mqngr leplz kcng tznibq-ngrdr nzrpipx-krdr Nrpa ngr Jisz.

¹⁰ X etumi natqdr nzrpi-krdr kx, “Yawe kc tqrninr, tr-esz'ngrn, x yrlq-angidrq natqm. ? Memule tqasa-ngrn nzayrplapx-krm lr nrlc kcng tznibqtilr nigr?”

¹¹ Mz nibrde sc tzataplxsrpeng lrpz kxprki, x nzrpibz badr kx, “Mzlemung kcng tzwztr-kzpzng mz Kxetu, sc tznibqti beng nidr, da kc tzwaisr-ngrdr nimu mzli kc. A' aenzlipwzmu ena, murde trkrlzkapzle me nangi bz ngr leplz kcng nanibqng.”

Zngya Ngr Drtwr Gct Krlzlezle Nrlc Tulvzo

¹² Zbz mc-moux Nei Sip kc nzniglc-krde kadol kraesz'mz. X vzm kc nengq kxetu, x nepi botapz' x temz pctx atwrnrngr apule mepyr. ✧

¹³ X vri ngr bongavz nztatio-lxblrng mz drtc', nzapulr nra nc kxpo kc tqrlxom mz nzayclwztikr nenq kxetu nrladrng. ✧

¹⁴ X bongavz kz nzmrbr-krde apule nqni kc tzbutr x sc tzkatxpe. X newz badr trmctu amrlx nzaprszpxng nidr me nzwxbu-ngrdrng.

✧ **6:12** Nzaelwapxngr 11:13; 16:18; Asaea 13:10; Joel 2:10, 31; 3:15; Matiu 24:29 ✧ **6:13** Asaea 34:4

15 X leplz kxtrnzrlxngitiung amrlx mz nrlc, kxmule-esz' king amrlx, kxnzeturung, kxnzaclveng ncblo ngr vea, bcnyrng, kxnzrngiscng zmatq badr leplz txneng, kxnzawz-nrbalqng, x kxdrtqdr opxng, leplz lcng amrlx sa namnc-kapqpxmqng mz butqbr x mz nabz newz. ✧

16 X sa nanemi-lzbzlr mz newzng x butqbrng, mz nzrpi-krdr kx, "Talvzom nigr, x amnc-kapqbz nigr mz mz Kxetu kc tqwxbuom mz tron x mz zngya ngr drtwr Nei Sip. ✧

17 Murde mzli ka sc tqkrlzpebzle Mzli Kxmatq nyz Gct ncdr Nei Sip, x trpnzng kx narlapx mz nzayrplapx-krdr nigr." ✧

7

Leplz Ne Gct Kcng Siu-trtqki-esz'-nzpnu-pwx-nrade-pwx (144,000) Narlapxng

1 Zbz obq-rmwible-moux, x mcx enjrl nzpwxng taplxsr bute' ngr nrlc, nzrpwa'-ngrdr nenq kcng pwx mz nrlc, murde nenq ma tqwq mz drtc', nounc, x prla. ✧

2 Zbz mc-kzx kzdq kz enjrl vzdzm Heven vzkimle me prkilzm nepi. X malele kc da kx nayrlq-ngrbz rlx mz leplz, nzaelwapxngr kx nzngineng Gct kc tqngi nou nzlungr. X etumibz nate nzkqle-krbzle mz enjrl kcng pwx tqrka-neba Gct zmatq ngr nzodatingr drtc' x prla.

✧ 6:15 Asaea 2:19-21 ✧ 6:16 Hosia 10:8; Luk 23:30 ✧ 6:17 Joel 2:11; Malakai 3:2 ✧ 7:1 Jeremaea 49:36; Daniel 7:2; Sekaraea 6:5

³ Rpibz enjrl kc kx, “Bzkq odatiamu ena drtc', prla, x nounc, nakrlz-zpwxbzle nzyrkr-pxkr nzryrlq-krbzk r kx ngr Gct rgu mz rtrlmz kxnzawz-nrbalq nedeng.”

⁴ X nzpim bange me nakrlzbz nzkqlukr leplz ne Gct kcng nartwzng r kx ngrde. Kxnzlxngiting kcng tzprpxmqng mz neidu lr Israel nakrlzbzle siu-trtqki-esz'-nznpu-pwx-nrade-pwx (144,000).

⁵⁻⁸ Leplz lcng siu-trtqki-esz'-nznpu-pwx-nrade-pwx (144,000) taplxsr neidu lr leplz kcng Israel nznpu-esz'-nrade-li (12). Murde neidu lcng amrlx nzrngine-lxblrng siu-nznpu-esz'-nrade-li (12,000) kx nzrtwzng r kx ngr Gct. Drtq neidu lcng nidr seleng,

Judz	Simion
Ruben	Livae
Gad	Isaka
Asz	Sebyulon
Naftzli	Josip
Manase	Benjamin

Zbo Ngr Leplz Kxetu Neng Gct

⁹ Mz nibrde, obq-rmwible-moux, x mcx kc zbo ngr leplz kxetu-esz'ngr. Nzkqlu-zlwzng x trpnzng r kx yatrpz nzrlwxngr. Nzprpxmqng mz nou, natq, neidu, x drtc' amrlx mz nrlc. Nztutrpeng mrkc tqxlvrkipx Nei Sip mz tron. Nzkq-lxblrng lrpz kxprki x nzrmale-lxblrng nabx nc paam mz nzabrtz-krdr.

¹⁰ Zbz sc tzetumipe natqdr nzrpi-krdr kx, “Nzarlapxngr vzpxm mz Gct rgr kc tqwxbuom mz tron, nimu ncd r Nei Sip.”

¹¹ Zbz enjrl kcngr amrlx tztu-ngalelvzlr tron mrkc tzmncng kxnzaclveng kcngr x kxnzlung kcngr pwx, sc tztco-lzbqng mrkc tqxlvrkipx tron mz nzangio-krdr Gct.

¹² Nzrpilr kx, “Eu, angida! Angiokr nim, aw-ibzkr bam, glqlzkr nim, x amatqkr nim. Pipxkr nzyrplapx-krm, nzxplr-krm, x zmatq ngrm, tqyc tqyc. Eu, angida!”

¹³ Zbz kzdq kxnzaclveng kcngr rpimle bange kx, “?Neke lcng tzkqng lrpz kxprki, x nzvzkimlr drlve?”

¹⁴ A' ayzlu-ngrbo natqde kx, “Kxetu, nim kx rkrlz.” X rpi-mople bange kx, “Krlcng leplz kx nzvzpxmqng mz Mzli r Nzxpungr Kxtrka-zlwz. X mzli ka nztapzopelr lrpzdr mz mepyr ngr Nei Sip, murde naprkitxpxpeng. ✧

¹⁵ Delc tztutr-ngrbzlr mrlc tqxlvrkipx tron nyz Gct mz nzangio-krdr nide mz Mangr-nzangiongr nyzde Heven, ngrlx x mz nrckxbq. X Gct kc tqwxbuom mz tron, sa namnc-zvzng badr mz nzaclve-krde nidr.

¹⁶ X trtxpengr nzbrtale-krdr x nzbrlxkzkr drtwrdr, x trtxpengr nrkrdrtdr nzyrlxkr nzulr nepi, nyr x kzdung kz da.” ✧

¹⁷ Murde Nei Sip kc tqtavau mrkc tqxlvrkipx tron, sa na-aclevele nidr na-apule ncblo kxaclevele sip nedeng x namailzle nidr mz aulz ngr lue ngr nzlungr. X Gct sa naycpqpxbzle drlemztr amrlx, murde naesakingr nzvzkr drtwrdr. ✧

✧ **7:14** Daniel 12:1; Matiu 24:21 ✧ **7:16** Asaea 49:10 ✧ **7:17** Sam 23:1-2; Esikel 34:23; Asaea 25:8

8

Nzrniglckr Nei Sip Kadol Krarlimz

¹ Mzli kc tqniglcngr Nei Sip kc kadol krarlimz, lr Heven amrlx nzmnc-nabutxng mzli kxpipz trkrlzpwzleu nabz-nepi kxesz'.

² Zbz mcx nar enjrl kcng rlimz tztutrpzng mrkc tqxlvrkipx Gct, x nzkabz badr trpu rlimz.

³ X kzdq mou enjrl vzm tutr mz olta kc tzwzngz mz gol, tqtutrpz mrkc tqxlvrkipx tron. X malele kc baol kx ngi gol, kx nayclz-ngrm bqlr nc ninz kxngc. X nzka-mopwz bade kcng bqlr nc ninz, kx nakamibzle nzkrka'kr leplz ne Gct amrlx mz olta. ☆

⁴ X mz nzglalzkr enjrl kc baol ngr bqlr nc ninz kc, zsikapu ngr bqlr nc ninz kxmnrte mrlz sc tqvzmilz lxblr nzkrka'kr leplz neng Gct, vzdz x krlzlbzle Gct.

⁵ Mz nibrde enjrl kc glaole kc baol ngr bqlr nc ninz kc, tekatrle mz nyr ngr olta x rtco-ngarde mz nrlc. X mzli lcdepwz bzlrpc tqpctipx, bzlrmei tqyrputipx x nrlc tqycngrlr atwrnrngr mz nengq. ☆

Trpu Kc Kai Drtwr Ngrde Nzatrkatigr Drtc'

⁶ Zbz enjrl kcng rlimz tzrtaplxsrng trpu, sc tzoliqpeng nzvxu-krdrleng.

⁷ Mzli kc enjrl kc kai tqvxutrle kc trpu nede, muli-aes x nyr rlxlvzmi mepyr nzrtco-ngrm mz drtc' apule tewa kxdc. Mz nzmu-krde lcde, nctq drtc' kxetu, vzmi nounc x nabr yrkrtxo mz nyr amrlx. ☆

☆ **8:3** Emos 9:1; Nzrlaszngz 30:1, 3 ☆ **8:5** Livae 16:2; Esikel 10:2; Nzrlaszngz 19:16 ☆ **8:7** Nzrlaszngz 9:23-25; Asaea 28:2; Esikel 38:22

Trpu Krali Drtwr Ngrde Nzatrkingr Prla

⁸ Zbz enjrl krali vxutrle trpu nede, x kzdq da kx apule newz kxetu kxngc nzrtcongr prla. X nctq prla kxetu nzlrtpixlr mepyr.

⁹ X dalr nctq prla lc amrlx nzbzting x lcsu amrlx mz prla lc nzodating. ✧

Trpu Kratq Drtwr Ngrde Nzatrkingr Lue

¹⁰ Zbz enjrl kratq vxutr-kzle trpu nede. X vri kxetu taom mz bongavz apuneomle kx ngxlu, x tao mz nctq lue kxkqlu, x aulz kxkqlu. ✧

¹¹ X drtq vri lcde 'Kxpiz,' murde apule lue lr nc rtc kxpiz. X lue kxkqlu lcng nilwzdr piz, x leplz nzkqlung kx nzbz-ngrdr nzrmnq-krdr lue lcng tqpiz. ✧

Trpu Krapwx Drtwr Ngrde Nzatrkingr Dalr Bongavz

¹² Zbz enjrl krapwx vxutr-kzle trpu nede. X nctq nepi, temz x vri nzatrking amrlx, murde ncte lcng nabzting. Mz nzmukrde lcde, kzdq nctq ngrlx tryzlr-ngru, x kxmule lcpwz mz nrl-ckxbq. ✧

¹³ Mz nibrde obq-mopwc' x mcx nzlvctxlzkr kzdq lr mrkc wq, x sc tqnemipele nzrpi-krde kx, "Nimu lr nrlc na-aclvetioamu. Murde mzli kc enjrl kcng tq navxutr-mou-ngrdr trpu nedr, nzayrplapxngr kxtrka-esz'ngr lang tq sa navz-kzpzng bamu."

✧ **8:9** Sekaraea 13:8-9 ✧ **8:10** Asaea 14:12 ✧ **8:11** Jeremaea 9:15 ✧ **8:12** Asaea 13:10; Esikel 32:7; Joel 2:10, 31; 3:15

9

*Trpu Kranzlvqn Drtwr Ngrde Nzatrkatigr
Leplz*

¹ Zbz enjrl kranzlvqn kc tqvxutrpele trpu nede. X mcx kzdq vri kx taopem Heven mz nrlc. Nzka**z** mz vri lc tqtaom kc ki kx nalvxlz-ngrde naonrx ngr gq kc trpnzngr noude.

² Kx lvxlzle kc gq kc, z**s**ikapu kxbotapz' ma-punelz**m**le apule z**s**ikapu ngr trmami, x amr-brtxde zyzlr ngr nepi, x awx-nzlo-atwrnr-ngrde bongavz. ✧

³ X vzpxm mz z**s**ikapu kc kionabr nzyrkromqng mz nrlc. X nzkabz badr zmatq ngr nzrtq-krdr leplz apupwzle nalx. ✧

⁴ Nzpi**b**z badr kx bzkq nzatrkatilr nabr, nounc, x lxbi. A' nzrlrtx-ngrpwz badr nzatrkatikrdr leplz kcng rkx ngr Gct tryctru mz rtrlr**m**ztr. ✧

⁵ Trnzrlr-ngrpwzu mz kionabr lcng nznibq-krdr leplz, a' nzaetq-zlwz-ngr**z**lr drtqdr mz temz kxnzlvqn. X zvetq kxetu lc na-apule zvetq ngr nzrtqkr nalx.

⁶ Mz nabz temz lcng nzlvqn, leplz kcng drtqdr tqetq sa nartangrtilr kzdq da kx nabz-ngrdr, a' trtxpnzngr nzmcti-krdrle. X nzsutitx zlwz drtwrdr nzbzngr, a' trtxpnzngr nzbz-krdr. ✧

⁷ Mc-kzx kionabr lcng nzapulr hcsi kx nzoliqng mz nzvo-krdr mz vea. X nardr lao-lxblr-ngrm da kx apule kraon kx ngi gol, x nardr apule nar ncblo. ✧

✧ **9:2** Nou 19:28 ✧ **9:3** Nzrlaszngr 10:12-15 ✧ **9:4** Esikel 9:4

✧ **9:6** Job 3:21; Jeremaea 8:3 ✧ **9:7** Joel 1:6; 2:4-5

8 Nqnginaridr boi apule nqnginar olvz, x nqngidr malc apule nqngi laion.

9 X nzkq-ngrdr temz ngr lomrdr da kx nzwzngzr mz aian kc tqyrputrngr nipna. X natq nzyrk-lzkr nabxdr apule natq sariot kcng tzvomi-anitpwzlr hcsi mz nzvecngr.

10 X dxpa' krdr kcng tqtutr mz nqglqdr nzapulr dxpa' kr nalx. X mz dxpa' krdr dekc tqyctrngr zmatq ngr nzrtq-krdr leplz mz temz kxnlvqn.

11 Nzrningeng king kx aclvele nidr, krlcde enjrl kc tqngi kxetu r gq kc trpnzngzr noude. X drtqde mz lr Jiu *Abadon*, x drtqde mz lr Grik *Apolion*, drtwr ngrde *Kxoda*.

12 Nzayrplapxngzr kxtrka-esz'ngr kc kai, dela tqyrkrpxpe. A' nzayrplapxngzr kxtrka-esz'ngr li lang tzvzbepqng.

Trpu Kraesz'mz Drtwr Ngrde Nzrnibqngzr Leplz

13 Enjrl kraesz'mz vxutrle trpu nede. X xlrx kc natq vzpxm mz nctq bute' kcng pwx mz olta kc tqngi gol tqtu mrkc tqxlvrkipx Gct. ☆

14 Rpibzle mz enjrl kraesz'mz kx, "Aopxpebz drtq Enjrl kcng pwx tzatolvangzr mz lue kc etu drtqde Yufretis, mzli ka."

15 Zbz sc tqaopxpebzle drtq enjrl kcng pwx, murde nanibqtilr nctq leplz kxetu mz nrlc. Enjrl lcng nzaenzli-ngrdr nabz nepi, zbq, temz, x yiz lcdepwz murde na-atutr-ngrdr nzwz-krdr lc.

16 X nzpim bange leplz ngr ami kxnzvo mz hcsi krlzbzle obu-trtqki-li (200 milion).

17 X mz nzobq-krnge opx mz mzke' hcsi kcng, x kxnzwxbuomqng badr. Nzkq-ngrdr temz ngr

☆ 9:13 Nzrlaszngzr 30:1-3

lomrdr da kx nzwzngnr mz aian, pc apule nyr, blu apule zsikapu, x plc apule rplz salfz. Nar hcsi kcng nzapulr nar laion x naodrng tqrpnapx-ngrm nyr, zsikapu x salfz kxngc. *

¹⁸ Mz nzayrplapxngnr lcng tq, nyr, zsikapu x salfz kxngc kcng tzrpnapxm mz naodr, nznibqtilr leplz kxnzkqlung mz nrlc.

¹⁹ Hcsi lcng mrkc tqmalcnepx mz nqglqdr apule nar ningidoe, x nzrmakx-ngdrdr leplz. Mz nzmukrde lcde, zmatq ngr nzaetq-krdr drtq leplz yctr mz naodr x nqglqdr kz.

²⁰ A' leplz amrlx kcng trnzbung mz nzayrplapxngnr lcng, tresakiu nzangio-krdr drka' x mqngr drka' kxnzlx kx nzwzngnr mz gol, silvz, bras, rplz x dapunc. X da lcng amrlx trpnzngnr da kx nzmclr x nzxlr, x trnzvzne-kzung. A' trnzaxtlru da lcng tzwz-ngdrdr mz mqdr. ✧

²¹ X trnzaxtx-kzlru nznibq-krdr, nzymnekrbzlr mz drka', nzrmwimi-krdr doa kx trngiu krnalzdr, x nzpnangr da.

10

Skrol Kxtpwz

¹ Zbz obq-rmwible-moux, x mcx kc enjrl kxmatq vzom Heven. Ngrlelvz dcbz apule lrpz kx kq-ngrde, x narde ngrlelvz nrpc'. Mzte luli apule nepi, x nanycde nzapulr nctrpou kx ngc-zli nyr.

* **9:17** Mz Nzryrngrkxtr mzli kang kqlu rplz salfz drtwr ngrde nzodatingr mz nzayrplapxkr Gct leplz. Mc Sam 11:6, Asaea 30:33; 34:9, Esikel 38:2 x Nzaelwapxngr 9:17; 14:10; 19:20; 20:10 x 21:8.

✧ **9:20** Sam 115:4-7; 135:15-17; Daniel 5:23

² Enjrl lc malele kc skrol kxnzyr kx nzkawx-pxpe. Nanycde kxrtc atuole prla x kxmc atuole mz drtc'.

³ X yrlqzbzle kc natqde kxetu, kx apule nzk-clwzkr laion kxetu. Zbz xlrzlx kc natq Heven, apule bzlrmei kxetu x ayzlu-ngrbzle natq enjrl nzwrdede rlimz.

⁴ Mzli kc tqayzlu-ngrbzle natqde, sc tqoliqtipez nzyrongr natqde kcng rlimz. A' mzli lcedepwz, kzdq natq Heven rpiomle kx, "Yrlq-kapq natq kcng rlimz, bzkq yroq."

⁵ Zbz enjrl kc nanycde tqtuokc prla x tuokc mz drtc', glalzle mqde kxrtc Heven. ✧

⁶ X esalz-ngrde drtq Gct kc nzlu-krde tqyc tqyc, x tqwz-ngrde bongavz, drtc', prla, x da kznikeng amrlx ycpxmng elr. ✧ X sc tqrpipe enjrl lcedekx, "Mzli r nzaenzlingr yrkrpxpe."

⁷ Murde mzli kc enjrl krarlimz navxutr-ngrde trpu nede, drtwr Gct kx yc-kapq kc tqpipx-pnzbzle mz profet nedeng kcng tzwztrpzng bade, sa natutrpe."

⁸ X nide kc tqycmneom Heven, xlr-moux nate, rpimle bange kx, "Vz x rtrngztibz skrol kc tzkawxpx mz mq enjrl kc nanycde tqtuokc prla x kzdq tqtuokc mz drtc'." ✧

⁹ X vzbo mz enjrl kc, sc tqrlxtipebo skrol kc topwz. Rpimle bange kx, "Twz x ngq. Sa naxngibzme mz naom nilwzde nzmrlz-krde apule hane. A' mzli kc navzope-ngrde mz nelzm, nelzm kc tqrlvqkrkxpe."

✧ **10:5** Nzrlaszng 20:11; Lou Kcpwz 32:40; Daniel 12:7; Emos 3:7

✧ **10:6** Nzrlaszng 20:11 ✧ **10:8** Esikel 2:8—3:3

¹⁰ Rtrngztibo skrol kc topwz mz mqde. Sc tqngqpex, x da zpwx, nzmrlzkr nilwzde mz naonge apule hane. A' mz nibr nzlwzo-krngele, nelznge kc tqrlvqkrkxpe.

¹¹ Zbz sc tzrpipe-mop bange kx, "Napipx-mouq natq Gct lcng tqycmnetr-ngrde drtc', leplz, natq x king kang kqlu."

11

Profet Ne Gct Kcng Li

¹ Zbz, mz nibrde nzkam kc bange neni kxboi apule dapunc ngr nzanengr, x nzrpim bange kx, "Tulzm, x vz mz nzanengr Mangr-nzangiongr Yawe x olta ngrde, x rlwx leplz kcng tzan-giopxmqng elr. ✧

² A' yrlqtxpx nrlarde makoa kcng yz, bzkq aneqng, murde nzkapebz mz leplz kxtrnzrlxngi-tiung kcng narnzlvzolz Jerusalem, navz nakrlzbzle yiz tq x ncte kc. ✧

³ Sa na-atwzlr-ngrbo profet nenge kcng li tzpx-ing lrpz ngr nzvzkr drtwr. X sa nayapwxtipxlr natq Gct mz nabz yiz tq x ncte kc." *

⁴ Profet lcng li nzapulr nounc olivi kcng li, x da li kcng nzwxbuo-ngrm lam, tqtutr mrkc tqxlvrkipx Gct, Kxetu kc tqaclvele nrlc. ✧

✧ **11:1** Esikel 40:3; 42:20; Sekaraea 2:1-2 ✧ **11:2** Luk 21:24

* **11:3** 11:2 Mz nzplzpxkr Jon zbq lcng, kzdu mzli pipxle yiz tq x ncte kc, kzdu mzli pipxle temz nznpu-pwx-nrade-li (42), x kzdu mzli pipxle zbq kcng siu-esz'-trtqki-li-nznpu-esz'mz (1,260). A' yro-tpwzkr 'yiz tq x ncte kc,' murde drtwr ngr mzli lcng tq kx namu-tpwzlr esz'. Mc kz Nzaelwapxngr 11:6, 12:6, 14, 13:5.

✧ **11:4** Sekaraea 4:1-14

⁵ Nzmu kzdq doa rpile na-atrkatile nidr, nyr sa navzpxm mz naodr mz nzodati-krde nide. X kxnamu-kzle lc nzbzkr doa kznike rpile na-atrkatile nidr.

⁶ X nzrngiscng zmatq ngr nzrpwa'-krbzlr mz bongavz nzdckr tewa, murde tewa ma tqdc mzli lc tzryapwpx-ngrdr natq Gct, mz yiz lcng tq x ncte kc. X nzrngisc-kzng zmatq ngr nzale-krdr lue nzlrtipx-krdr mepyr, x zmatq ngr nzatrkatikrdr lr nrlc mz zyagox kznikeng nasuti drtwrdrle. ✧

⁷ Mzli kc tqyrkrpxpengr profet lcng nzyapwxtikrdr natq Gct, Mrlx Kc Tqdrka'ngr tqdwalzm mz gq kc trpnzng noude, sa naotang badr. Sa naovxiole nidr x nanibqleng. ✧

⁸ X namz ngrdr sa nayrbqtxng mz lrpzki kx nzvzkitr leplz kxkqlu mzteadau Jerusalem, mrkc tztqlvztrngr Kxetu rdr mz kros. Mzteadau lc nzymne-ebzpxngr drtq 'Sodom' o 'Ijipt,' murde lr Jerusalem trnzlxngiti-kzlru profet ne Gct da kc tzwai lr Sodom x lr Ijipt trnzrlxngiti-krdr. ✧

⁹ Zbz leplz ngr nou, natq, neidu, x drtc' amrlx naobqlvzlr namz ngrdr, z bq natq x ncte kc. X trnarlrpx-ngrdr nzyrtzmqng namz ngrdr.

¹⁰ X lr nrlc sa na-abrtz-zlwz-ngrdr nzxlr-krdr nzbzkr profet lcng nzling. X sa nartrngzbnzng nzmung x narka-etrng da, murde profet lcng nzling kc tzaetqbzlr drtq lr nrlc.

¹¹ Mz nibr nzyrbqtikr namz ngrdr z bq tq x ncte kc, Gct sa na-atulz-mople nidr mz nzbzng

✧ **11:6** 1 King 17:1; Nzrlasng 7:14-21; 1 Samwel 4:8; Luk 4:25; Jemes 5:17 ✧ **11:7** Daniel 7:7, 21; Nzaelwapxngr 13:5-7; 17:8

✧ **11:8** Asea 1:9-10

mz nzvxutr-krbzle nzlu-krde badr. X kx namc leplz kxnzklung nztulz-mou-krmlr mz nzbz-krdr, namwxlr-zlwz-ngrdr. ✧

¹² X mz nibrde, sa naxlrz profet kcng nzling Heven kzdq natq kxetu, narpiomle kx, "Vzdz-mamu mrka!" X mzli lcde, sa naobqlvzlngr leplz kcng tzmwati drtwrdr nidr, nzvzdz-krdr Heven mz nabz dcbz. ✧

¹³ X mzli lcpwz, nengq kxetu sa navz-kzp mz nzodati-krde kzdq nctq Jerusalem x nabzng mz nengq lcde leplz siu-rlimz (7,000). X leplz kcng tzlu-txpwzng namwxlr-zlwzng x naglqlzlr Gct kc Heven.

¹⁴ Nzayrplapxngr kxtrka-esz'ngr krali delc tqkapupxpe, a' se tqvz-nqblqpe-kzp nzayrplapxngr kxtrka-esz'ngr kratq.

Trpu Krarlimz Drtwr Ngrde Nzacive-angidrkr Gct Nrlc

¹⁵ Zbz enjrl krarlimz kx vxutrle kc trpu nede, kzdung natq kxetung Heven nzrpilr kx, "Zmatq ngr nznginingr King mz nrlc ycbz mz Kxetu Gct rgu ncdr Kxnzmcpz nede. X Gct sa tqacive mzli ka x nzacive-krde tqyc tqyc!" ✧

¹⁶ Zbz kxnzaveng kcng nzpnu-li-nrade-pwx (24) tzwxbuong mz tron mrkc tqqlvrkipx Gct, nzrtco-lzbqng mz drtc', x nzangioldr Gct.

¹⁷⁻¹⁸ Nzrpilr kx,
 "Kxetu rgr, Gct kc tqrnir,
 Kc tqmnc mzli ka,
 X tqmnc pnz. Awi-ngrbzkr bam,
 Nztwzpe-krm zmatq ngrm,

✧ **11:11** Esikel 37:5-14 ✧ **11:12** 2 King 2:11 ✧ **11:15** Nzrlaszng 15:18; Daniel 2:44; 7:14, 27; Asaea 9:7

X nipem King r nrlc ka.
 A' lr mrkzbleng ngyati
 Drtwrdr nimq murde
 Nzkaputr-krm mzli r nzayzlu-krbzme
 Da mz leplz kxznzbpeng.

“X mzli r nzrka-krbzme
 Da kxmrlz mz profet
 Kcng tzwztrpzng bam, badr leplz nemqng
 Amrlx kcng tzamrluelr nim,
 Kxmule-esz' kxnzetung o leplz txneng.
 X krlzpe-kzpzle mzli
 Nzrmiltxo-krm
 Krkcng tznibqtilr
 Leplz nemqng mz nrlc ka.” ✧

¹⁹ Zbz Mrkc Tqtr Mangr-nzangiongr Gct Heven
 nzlvxpx, x Bokis kc Tqyclz-ngrm Nzesz'tikr
 Drtwrdr Badr Leplz Nedeng, sc tzmcpce elr.
 Mzli lcde bzlrpc tqpctipx, bzlrmei tqyrputipx,
 nrlc ycngrlr atwrnrngr mz nengq, x muli-aes
 kxetuting tqvztiom apule tewa kxdc. ✧

12

Olvz Kc Tqngi Israel X Doa Nede Kc Tqngi Mevalu

¹ Zbz kzdq rlx kxmatq prpxm mz bongavz. X
 mcx kc olvz kq lrpz kx apule nepi, x tuo-ngrmle
 temz x ngrlelvzle narde vri nzpnu-esz'-nrade-li
 (12) apule kraon ngr narde.

² Olvz lc yr x tangqgx mz nzetqtikr drtqde
 nzrmika-krde.

✧ **11:17-18** Sam 2:1-2; 110:5; 115:13 ✧ **11:19** Nzaelwapxngr 8:5;
 16:18, 21

³ Zbz kzdq r kx kxmatq prpx-mop mz bongavz. Krlcde mepwz kxpc kxetu, narde rlimz, taplxsr kraon kxtpowzting, x scde dxpa' kxetu nzpnu-esz'. ☆

⁴ Mepwz lcde nqglqde iplro-ngrmle vri ngr bongavz kxnzkqlung mrka mz drtc'. X vzbz mz olvz kc, sc tqtu-pz'litrpebzle doa kc namikale, murde nangqde. ☆

⁵ Olvz kc rmika x nede doa ncblo. A' doa ne olvz kc trngqu Mepwz kc murde nzglqz-rlrubz mz Gct mrkc tqwxbu-ngrde mz tron. Nide kc nacivele leplzng amrlx mz zmatq kx xplr-esz'ngr, *na-apule bz kc tqrniglc botol.* ☆

⁶ X olvz kc sc tqdwatrpe lzke, me oliqtibz Gct mz nzmncpx-krmle elr mz yiz kcng tq x ncte kc. ☆

Enjrl Nzaovxiolr Drka' Neng Setzn

⁷ X vea kxetu kc tqprtze Heven, Narenjrl Maekol badr enjrl nedeng nzvecng badr Mepwz. X Mepwz badr enjrl nedeng nzotang badr. ☆

⁸⁻⁹ Mepwz kxetu kc tqngi kz ningidoe ngr nrlanc kc bqnc, tizrpi-kzpz 'Nar Drka' x 'Setzn.' Nide enqmi r leplz murde tqpibqle leplz x tqesabrtile leplz ngr nrlc atwrnrngr. Nzvecng x Mepwz badr enjrl nedeng sc tzaovxiopeng Maekol badr enjrl nedeng. X trnzrlrpe-ngrpwzu nzmnc-krdr mou Heven. Nzrtcmipxngr enjrl nedeng Heven x nztaomqng mz nrlc, mz nzngini-krdr drka'. ☆

☆ **12:3** Daniel 7:7 ☆ **12:4** Daniel 8:10 ☆ **12:5** Sam 2:9; Asaea 66:7 ☆ **12:6** Nzaelwapxngr 11:2 ☆ **12:7** Daniel 10:13, 21; 12:1; Jud 9 ☆ **12:8-9** Nou 3:1; Luk 10:18

10-12 Mz nibrde, xlrx kc natq kxetu Heven, rpile
kx, ☆

“Gct rgu sa na-arlapxle
Leplz nedeng mzli ka.
Sa natwzpele zmatq ngrde,
X nangipe King mz nrlc.
Kxnmcpx nede twzpele zmatq ngrde,
X Setzn kc tqpiqtitr-
Zvzbzle kztegunq
Mz mz Gct rgu,
Nzrtcpxpengr Heven.

“A' kztegunq nzaovxiopelr
Nide mz zmatq ngr mepyr
Ngr Nei Sip. X nimu lr Heven
Na-abrtz-zlwzamu.
A' nimu lr nrlc ka
Na-aclvetioamu.
Nar Drka' vzopebz bamu.
Drtwrde ngya zlwz murde nzmnc-krde
Mrla mzli trnaboiu.”

*Mepwz Nzotang Badr Olvz Kc X Doa Nedeng
Amrlx*

¹³ Kx glxpe Mepwz kc nzrtco-ngrm nide mz
nrlc, sc tqmaneutinepele lxede doa kc.

¹⁴ A' olvz kc lvctr-ngrde mrnyzde mrkc lzke
nabx lr kxetu li kx nzkabz bade. X namncpx-
ngrmle mrkc nakrlzbzle yiz kxtq x ncte kcng,
murde namnc-rlrubz mz Mepwz kc. ☆

☆ **12:10-12** Job 1:9-11; Sekaraea 3:1 ☆ **12:14** Daniel 7:25; 12:7

¹⁵ Zbz Mepwz kc sc tqbyape-ngrbzle lue kxkqlu mz nibr olvz kc, murde natwz nubla ngrde x trpnzngr nzrlapx-krde.

¹⁶ A' drtc' okatrle olvz kc. Amzpxle naode x mnqle nubla ngr lue kc tqbyapxngr Mepwz kc yrkrtxo.

¹⁷ Zbz Mepwz kc sc tqngyatipe drtwrde olvz kc, x sc tqvzpe mz nzvec-krdr badr kzdung kz doa nedeng, kcng tzvz-nqblqlr Loukxtr sc Gct, x tzlxngitilr natq angidr kcng tqpipx Jisz.

13

Mrlx Kc Tqdrka'ngr Kc Kai Tqngi Enqmi Kc Etu Ngr Kraes

¹ Zbz obq-rmwible-moux, x Mepwz sc tqtupe mepz prla tqaenzlipxpe. X mcx Mrlx Kc Tqdrka'ngr kx vzdzm prla. X nzyrtr-lxblrng mz narde rlimz drtq kx bletipx-lxblrng kx nzxtrnga-ngrdr Gct. X scde dxpa' nzpnu-esz', taplxsr kraon kxtpwz. ☆

² Mrlx Kc Tqdrka'ngr tqmcx apule trputi kzpeto kxetu. Drkrvi ngr nanycde boi x malc apule drkrvi ngr nanyc kzdq kz animol kzpeto. X nzxplrkr naode apule nao laion x nqngide malc. X rngisc zxplr, kraon x zmatq kx aprcbz Mepwz bade.

³ Opxm kx kzdq nar Mrlx Kc Tqdrka'ngr lcde nzataki pnz x ycpwz pipz nzbz-krde. A' mztitpe x bzmrde sc tqyctxtr alo. Kx nzmclr Mrlx Kc Tqdrka'ngr, lr nrlc amrlx nzktitxpxlr x sc tzvz-nqblqpelr natqde.

☆ **13:1** Daniel 7:3-25; 11:6

⁴ X nzangio-kzlr Mrlx Kc Tqdrka'ngr, mz nzrpi-krdr kx, "Trpnznggr kx rtakitr nzxpplrkr Mrlx Kc Tqdrka'ngr. X trpnznggr kx yatrpz mz nzota-krdr ncdr murde na-aovxiote nide." X nzangio-kzlr Mepwz murde nzaprc-krbzle zmatq mz Mrlx Kc Tqdrka'ngr.

⁵ Mrlx Kc Tqdrka'ngr napivxitiote Gct mz nzglqpx-lzbq-krde mz nzymne-krde. A' zmatq lc nzrlrtx-ngrpwzlrle bade yiz tq x ncte kc.

⁶ Sc tqpibqtipele x tqxcbqtipele Gct, drtqde, me mnc-ngrde x lr Heven amrlx.

⁷ Nzrlr-ngrbz bade nzota-krdr badr leplz neng Gct x na-aovxioleng. X kxnzvpzpxmqng mz nou, natq, neidu, x drtc' amrlx nzmnczbzng mz zmatq ngrde.

⁸ Leplz mz nrlc tulvzo sa na-angioler Mrlx Lc Tqdrka'ngr, krkcng drtqdr trnzyrou mz Buk ngr Nzlunggr sc Nei Sip kc tznibq. A' kxnzrlxngiting kcng drtqdr tzyro elr abzo mzli kc tqwznggr Gct nrlc, trtxpnznggr Mrlx Lc Tqdrka'ngr. ✧ *

⁹ Abzamu nzyrlq-angidr-krmu natq lcng navzm.

¹⁰ doa kx pnzpe drtwr Gct napresin, sa napresin. X kx pnzpe drtwr Gct nanibq mz toki r vea, sa nanibq mz toki r vea. Mz nzmukrde lcde, mzli kc naprtz-ngrbz da lcng bamu, tu-amqngiamu mz nzrlxngiti-krmu x abrtzpmu drtwrmu mz Gct. ✧

Mrlx Kc Tqdrka'ngr Krali Tqngi Profet Kxpokia

✧ **13:8** Sam 69:28

* **13:8** Setzn mncpx-ngrmle Mrlx Kc

Tqdrka'ngr Kc Kai. ✧ **13:10** Jeremaea 15:1; 43:11

11 Zbz mc-moux kzdq kz Mrlx Kxdrka'ngr kx vzdzm mz drtc'. Dxpā' krde li kxtpwz apule dxpā' kr Nei Sip, a' nzymne-krde xplr apule nzymnekr mepwz.

12 Mrlx Kc Tqdrka'ngr lc tutrpz mz krkc kai x zmatq ngrde apupwzle zmatq ngr krkc kai. X rtultr-ngrbzle mz lr nrlc amrlx nzenio-krdr Mrlx Kc Tqdrka'ngr kc kai tqyctrngr bzmr kxsqki.

13 Mrlx Lc Tqdrka'ngr krali, na-aletile rlx kxkqlu. Krlzle nzavzo-ngrm nyr bongavz mzli kc tzobqngr leplz kxkqlu.

14 Nzrlr-ngrbz mz Mrlx Kc Tqdrka'ngr krali nzalet-krbzle rlx mz mz Mrlx Kc Tqdrka'ngr kc kai. X mz nzale-krde rlx lcng, esabrti-ngrde leplz kxkqlu mz nrlc. Krkc Krali pibzle badr nzrlz-krdr mqngr Krkc Kai tzataki mz toki r vea a' sc tqlupe mou, murde leplz na-angiolr nide mz mqngr kxnzlc.

15 X nzrlr-ngrbz mz Mrlx Kc Tqdrka'ngr krali nzvxutr-krbzle mz nao mqngr Mrlx Kc Tqdrka'ngr kc kai tzlzl; murde naycmne, x nanibqtile leplz kcng trnzangiolru nide.

16 Mrlx Kc Tqdrka'ngr krali rtultr-ngrbzle mz leplz txneng, kxnzetur, bcnyrng, nra-nzlung, kxnzawz-nrbalqng x kx drtqdr opx nzyctrkr rlx mz mqdr kxrte o mz rtrlmztr.

17 Trpnzngr kx naxpe x na-amwa da, kx trtwzkale rlx lc tqngi drtq Mrlx Kc Tqdrka'ngr kc kai o nabz kx ngi rlx ngr drtqde.

18 X nabz lcde trtqki-esz'mz-nzpnu-esz'mz-nrade-esz'mz (666). Doa kx drtwrde aotr-angidrbzle mz nabz lc, nide kx narmc drtwr ngr nabz sc Mrlx Lc Tqdrka'ngr, murde ngi nabz sc

kzdzq ncblo. Drtwrmu na-aotr-angidrbzmu mz da lcng murde naglx-angidramu nide mzli kc navzm.

14

Kxnzrlapxpeng Sc Tzngripe-ngrdr Kc Nabz Kxmrna.

¹ Mz nibrde, obq-rmwible-moux, x mcx Nei Sip kc nztuo-krmle mz Newz Saeon kxmngi, nidr badr kxnzrlapxpeng kcng siu-trtqki-esz'-nznpu-pwx-nrade-pwx (144,000). X drtq Nei Sip x drtq Trtede nzyrtr-pnzbz mz rtrlmztr. ✧

² X xlrx kc nzngrngr Heven, nate etu-esz'ngr apule nzyrpukr nrc x bzlrmei. X nzngrngr lcde tqxlrx nzyrlvi-krde apu-kzle nzyrnkr nqvi r gita kxkqlu.

³ Leplz kcng siu-trtqki-esz'-nznpu-pwx-nrade-pwx (144,000) nzngr-ngrdr kc nabz kxmrna mrkc tqxlvrkipx Gct, badr kxnzlung kcng pwx, x kxn-zaclveng kcng nznpu-li-nrade-pwx (24). Nabz lc tzng-rngrdr trpnz-moungr kx ryatitr nzngrngr, a' ngi txpwz krkcng tzxpetrpeng mz lr nrlc.

⁴ Trnzvz-nqblqlru nqm q kr lr nrlc, a' nidr leplz kx nzalqti-lzbqng mz nzapu-krdr ncblo o olvz kxnmnc-kamelr. X nzvz-nqblq-zvzlr Nei Sip drlve ke vzkile. Leplz lcng xpetrpeng Gct mz lr nrlc, murde nayrlqpx-bekang mz nzwztr-krbzlr mz Gct x Nei Sip, da kc tqwai nzyrlqpx-bekangrbz mz Gct x Nei Sip nra nounc kcng ayrnrngr.

⁵ Trnzpokiaung x nqm q krdr tubqbz mz nzobqkr Gct. ✧

Nrpa Kxmrlz Tqycpe Tqycpe

⁶ Zbz mcx kc enjrl kx lvc mrkc wq mzlilxlr, x rlem nrpa kxmrlz kc tqycpe, tqycpe mz lr nrlc, x mz nou, natq, neidu, x drtc' amrlx. Nrpa lc nrpa ngr nzaclve-angidrkr Gct.

⁷ X rpibzle mz nate kxetu mz leplz amrlx kx, "Amrlueamu Gct x glqpxamu nide, murde mzli r nzayzlu-krbzle da mz leplz dekape. Mzli lc sa nakabzle da kxmrlzting mz leplz kcng tztubq-esz'ngrng x sa na-ayrplapxle leplz kcng tzpxtpx-ngrdr nzyrlq-angidr-krdr natqde. Mz nzmu-krde lcde, na-angioamu Gct kc tqwz-ngrde bongavz, drtc', prla, x aulzng."

⁸ Zbz mc-moux kc enjrl krali lvc-nqblqmle enjrl kc kai, x rpile kx, "Taon kc etu, apule Bxbilon kc bqnc, kc tqrngisc zmatq kx xplr, tzmilxtxo. Nzmncr lr Bxbilon trka. X nzangio-krdr drka' apule nzabeati-krdr nzrmwimingr, murde trnzngida-zpwxung mz nzangio-krdr Gct angidr. Leplz mz nrlc tulvzo nazxvctr-lzbqzbng mz alwx ngrdr x opxm kx alukurnr-ngrng waen. Mz nzmu-krde lcde, Gct sa na-ayrplapxle leplz lcng amrlx." ✧

⁹⁻¹⁰ X mc-moux kc enjrl kratq lvcm mz nibr krkcng nzling. X etumi nate nzrpi-krde kx, "Doa kx angiole Mrlx Kc Tqdrka'ngr kc kai x mqngrde kc tzlz x nzyrtr-kzpz mz rtrlrmzte o mz mqde kxrtc rkx ngrde, sa na-ayrplapx Gct mz nztutr-krbzlr mz Nei Sip badr enjrl kxnzmatqng. Zngya ngr drtwrde sa naxplr-esz'ngr mz nzayrplapx-krde leplz lcng. Sa na-aetqti-zlwzbzle drtqdr x sa

✧ 14:8 Asaea 21:9; Jeremaea 51:8

naodati-atwrnr-ngrng mz nyr kxpq-esz'ngr ngr rplz salfz kxngc. ✧

¹¹ Trpnzngr nzyrkrpxkr nzetqkr drtqdr, krkcng tzangioldr Mrlx Kc Tqdrka'ngr x mqngrde kc tzlz, x tztwzlr rlx ngr drtqde. Nzetqkr drtqdr vztx alo, ngrlx x mz nrckxbq, murde zsikapu ngr nzngckr nrkrdrtdr tqvzpe tqvzpe.” ✧

¹² Drtwr ngrde kx nimu leplz neng Gct, kcng tzyrlq-angidrlr natqde x tzvz-nqblq-zvzlr Jiszs, na-abrtrpzmu drtwrmu bade mz nzaenzli-krmu, murde sa na-ale Gct nike pipxle.

¹³ Mz nibrde, xlr-moux kc natq Heven, rpimle bange kx, “Yro natq lcng. Abzope mzli ka, sa namrlzbz mz leplz kcng tznibqting murde nzlxngitilr Kxetu rgü.” Rpi Mqngrkxtr kx, “Eu, da angidrtx! Murde nzetqkr drtqdr kx vzpxm mz nzwztr-krbzlr mz Kraes sa nayrkrpxpe, x Gct sa narkabz badr nzmnc-zpwxngr x da kxmrlzting mz nzwztr-krbzlr bade, kxmule-esz' nike prtzbz badr.”

Nzayrlwr-lxblnrg Lr Nrlc Apule Nzrkqtrngr Nra Nounc

¹⁴ Mz nibrde, obq-rmwible-moux, x mcx kc dcbz kxprki. X mz dcbz lcde, wxbuom kc ncblo elr apule Jiszs, Mrlx Leplz. Laom mz narde kc kraon kx ngi gol x malele kc toki kxka x malc. ✧

¹⁵ Zbz, mcx kc enjrl vzpxm Mangr-nzangiongr, x mz nate kxetu rpibzle mz ncblo kc tqwxbuom

✧ **14:9-10** Nou 19:24; Matiu 5:22; 8:12; 10:28; 13:42, 50; 18:9; 22:13; 24:51; 25:30; Mak 9:47-48; Luk 13:28; 16:24; Jud 7; Nzaelwapxngr 9:17; 19:20; 20:10; 21:8 ✧ **14:11** Asaea 34:8-10

✧ **14:14** Daniel 7:13

mz dcbz kx, “Mzli ka mzli r nzayrlwr-lxblrpengr leplz kxnmrlzng ngr nrlc, da kc tqwai nzrkqtrngr nra nounc kxnmrlz mz toki mzli kc nabrpe-ngdr. Mz nzmukrde lcde, aylwr lxblr leplz kxntubqng ngr nrlc.” ✧

¹⁶ Zbz mrlx kc tqwxbuom mz dcbz yrlqbzle toki kxka scde mz nrlc, x leplz kxntubqng amrlx nzyrlwrtr-lxblr-pnzng.

¹⁷ Zbz, mc-moux kzdq kz enjrl kc tqvzpxm Mangr-nzangiongr Heven. Enjrl lc male-kzle kc toki kxka kxmalc.

¹⁸ X enjrl kc tqaclvele nyr ngr olta vzpxm mz olta. Rpibzle mz enjrl kc tqrmale toki kxka kxmalc kx, “Mzli ka mzli r nzayrlwr-lxblrpengr leplz ngr nrlc tulvzo kcng tzaleng alwx, da kc tqwai nzrkqtrngr nra grep mz toki mz mzli r nznzbrtiongr.”

¹⁹ Murde leplz kcng tzaleng alwx nzapulr nra grep. X enjrl kc tqayrlwr-lxblrle leplz lcng, apule ncblo kc tqrlakipx nra grep mz toki scde. X leplz lcng sc tzayrplapx-zlwzpeng mz zngya ngr drtwr Gct kc tqtubq-esz'ngr, apule nzrtcongr nra grep mz da kxetu kx narnzbrtio-ngdr mz nzwz-krdrleng murde nangi lue.

²⁰ Mzli kc tznzbrtiongr nra grep, lue lr nra grep kxpc yrlepx zlwx. X mz nqmq lcpwz, Gct sa na-ayrplapxle leplz ngr nrlc kcng tzaleng alwx. Sa na-apule kx rnzbrtiole nidr, x mepyr ngrdr kxpc nayrlepx kz na-apule nzyrlepxkr lue lr nra grep. X me nakrlzbx nubla ngr mepyr ngrdr takitr kilomita kx trtqki-tq (300) x nzboo-krde

✧ **14:15** Joel 3:13; Matiu 13:30, 39-43

krlzmle nabx ncblo, murde nzayrplapxkr Gct kxnaleng alwx sa naetu-esz'ngr. ✧ *

15

Nzayrplapxngr Kxnzrmnr-ngrbzngr Kcng Rlimz Tzoliqting Heven

¹ Mz nibrde, mc-moux rrx kxmatq mz bon-gavz x kctipx-zlwzx. Enjrl nzrlimzng nzkabz badr nzayrplapxngr rlimz. kxnzrmnr-ngrbzngr. Murde mzli kc nayrkrpx-ngrbz nzayrplapxngr lcng, zngya ngr drtwr Gct kc tqyrkrpxpe-kzpz.

² X mc-kzx prla kx apule dzipq kx rlxlvzmi nyr. X leplz kcng tzaovxiolr Mrlx Kc Tq-drka'ngr, murde trnzangiolru mqngrde kxnzlx x nzpx-ngrdr nzrtwz-krdr rrx ngr drtqde. Nztu-aepztrng mz prla lc x nzrmale-lxblrng gita kx kabz Gct badr.

³⁻⁴ X nzngr-ngrdr nabz ngr nzmyalz-esz'ngrkr Gct mz nzarlapx-kai-krde leplz nedeng mz kxnzawz nede Mosis, x mz Nei Šip kc ate. ✧ Nzrpilr kx,

“Yawe, Gct kc tqrninr,

King abzo mzli kc bqnc

Krlzmle mzli ka, nzwz-krmqng myapx-

Esz'ngr x kctipxkrng.

Nqmq krmqng da angidr,

X tubq-esz'ngr.

Lepz nzamrluelr nim.

X trpnzngr kx napxtpx-ngrde

✧ **14:20** Asaea 63:3; Nzyrningr 1:15 * **14:20** Nzboikr nubla ngr mepyr lc apule mrka Santz Krus krlzbzle Santz Ana o Santa Krus krlzbzle Tikopia. ✧ **15:3-4** Nzrlaszng 15:1

Nzqlqlz-krde nqm̄q krm.

“Nim txpwz kxtr-esz'ngr,

X nzamrluelr nim.

Trpnzngr leplz kx napxtxpx-ngrde

Nzqlqlz-krde nqm̄q krm.

Murde nqm̄q krm̄qng kxtubq,

Lr nrlc amrlx sa navzm̄qng

Mz nzangio-krdr nim.

Murde aelwapxpe-ngrn nqm̄q krm̄qng kxtubq,

Tubq-esz'ngr, eu.” ✧

⁵ Mz nibr nzngr-krdr, obqlzbo x mcx Mrkc Tqtr-esz'ngr mz nabz Tentkxtr nzlvxpxpe Heven. ✧

⁶ X nzvzpxm̄qng elr enjrl kcng rlimz tZRka-nebang nzayrplapxngr kcng rlimz. Enjrl lcng nzk̄qng amrlx ngrdr nzk̄q kxprkitxpx, x nzlunyao-ngrdr kc da kx apule gol.

⁷ Zbz kzdq kxnzlung kcng pwx twzbzle baol rlimz kx ngi gol ataplxsr-ngrde enjrl kcng rlimz. X Gct kc tq̄lu zvz, sa nalva-puliole mz nrlc zngya ngr drtwrde na-apule baol lcng nayrbu-lxblrng mz nzayrplapx-krdeng.

⁸ Mrkc Tqtr lvabqtx atwrnrngr zsikapu kx vzpxm̄ mz zluli x zmatq ngr Gct. X trtx-pnzngr kx navztr Mrkc Tqtr, navz navz nakrlz-zpwxbzle nzyrkrpx-krbz nzayrplapxkr Gct lcng rlimz tztwzm enjrl lcng rlimz. ✧

✧ 15:3-4 Jeremaea 10:7; Sam 86:9 ✧ 15:5 NzrlaszngR 38:21; 40:1-33; Aposol 7:44; Hibru 8:5 ✧ 15:8 NzrlaszngR 40:34; 1 King 8:10-11; 2 Be Ngrdr 5:13-14; Asea 6:4

16

Nzayrplapxng Kcng Rlimz Narmnr-ngrbzng

¹ Zbz xlr x kc natq Gct kx xplr Mrkc Tqtr, rpibzle mz enjrl kcng rlimz kx, "Vzamu, x odati-atwrnr-ngrnamu dalr nrlc mz zngya ngr drtwrnge, naapule baol ngr lue kxpq kc tzpulilvztiongr da, x blo atwrnrngr."

Baol Kc Kai Drtwr Ngrde Kxsqki Kxtrka

² Enjrl kc kai vz x puliole baol scde mz nrlc. X kxsqki kxtrka apule naasake x nranrpqdo dwatibzle leplz kcng tztwzlr rlx ngr Mrlx Kc Tqdrka'ngr, nzangioldr mqngrde. ✧

Baol Krali Drtwr Ngrde Nzatrkingr Prla

³ Zbz enjrl krali puliole baol scde prla. X prla yrncvz apule mepyr ngr ncblo kxbz. X dalr prla amrlx nzbzting. ✧

Baol Krataq Drtwr Ngrde Nzatrkingr Lue

⁴ Zbz enjrl kratq puliole baol scde mz lue x aulzng, x lue amrlx nzlrtipxlr mepyr. ✧

⁵ X xlr x enjrl kc tqaclvele lue amrlx, rpibzle mz Gct kx, "Gct, nim txpwz kxtr-esz'ngr, mncq mzli ka x mnc-zvzq mzli kc. X nzayrplapx-krm lcng tqtubq-esz'ngr.

⁶ Murde leplz lcng tznibqtilr profet x leplz kxnztr nemqng mz nzayrle-krdr mepyr ngrdr. Mz nzmu-krde lcde, ayzlu-mou-ngrbzme badr mz nzlrtipx-kreme lue pqdr mepyr x rka txpwzme mqdr mepyr. X me tubqki nzxpengr nidr delape."

✧ **16:2** Nzrlaszng 9:9-11

✧ **16:3** Nzrlaszng 7:17-21

✧ **16:4**

Sam 78:44

⁷ Zbz xlr-moux natq leplz kcng tznibqti vzpxm mz olta, nzrpilr kx, “Kxetu rgr, nim Gct kc tqrninr. Awitxpe mz nzayrplapx-krm krkcng tznibqtilr nigr! Murde drtwr kcng tqyrlqpeq rsakrlrngr x tubq zvz.” ✧

Baol Krapwx Drtwr Ngrde Nzpqr Nzulr Nepi

⁸ Zbz, enjrl krapwx twzle baol scde x pulilvzle nepi murde nzulr lr nepi na-apqle ncblo, x nrkrdrdqdr nabxuting.

⁹ X mzli kc tzbxuti-ngrdr mz nzulr nepi, nzpibqtilr Gct kc tqatwzlr-ngrm nzayrplapxngr lcong. A' nzpctxpx-ngrdr nzteqqr-krdr nqmq nr drtwrdr murde naglqpxlr nide.

Baol Kranzlvqn Drtwr Ngrde Mrnyz Mrlx Kc Tqdrka'ngr Kc Kai Wx-nzlotx Atwrnrngr

¹⁰ Zbz enjrl kranzlvqn twzle baol scde x puliobzle mz tron nyz Mrlx Kc Tqdrka'ngr kc kai. X mztea amrlx kcng tqaclve Mrlx Kc Tqdrka'ngr wx-nzlotx atwrnrngr. X leplz ngr mztea lcdeng tzmakitilr nalzpqdr murde nzetq-zlwzkr drtqdr etunepxpe mou. ✧

¹¹ X sc tzipbqti-zlwzpelr Gct kc Heven mz nzetqqr drtqdr x kxsqki rdr, a' nzpctxpx-ngrdr nzesakingr nzalengr alwx.

Baol Kraesz'mz Drtwr Ngrde Nzpqr Lue Yufretis

✧ **16:7** Sam 19:9; Nzaelwapxngr 6:9-10; 19:2 ✧ **16:10** Nzrlaszngr 10:21-22

¹² Zbz enjrl kraesz'mz puliole baol scde mz Lue Yufretis, x lue lc etu pzlz-pnzm, murde narlr-ngrbz mz king r me prkilzm nepi nzkawimio-krmleng ami nedrng. ☆

¹³ X mcx drka' kxnztrkang nztqng, nzapulr teblika. Dwapxm kc mz nao Mepwz, dwapxm kc mz nao Mrlx Kc Tqdrka'ngr kc kai, x dwapxm kc mz nao Profet Kc Tqpokia, (kc tqngi kz Mrlx Kc Tqdrka'ngr krali).

¹⁴⁻¹⁶ Drka' lcnq nztqng nztrka-zlwzng, x nzrngiscng zmatq ngr nzalrtingr da. Sc tzayrlwr-lxblr-ngrdr king amrlx ngr nrhc me esz', drtqde 'Newz Magedon,' mz nzngini-krdr ami kxes' kxetu. Mz Mzli Kxmatq lc, Gct kc tqrninr sa naotang badr Mepwz, Mrlx Kc Tqdrka'ngr, x Profet Kc Tqpokia badr ami nedr. ☆

X mz nzymnekr Jiszs mz nyzylu-krmle, rpile kx,

"Ninge la nayzlu-mopwc' mz nrhc. X nzvz-krmc na-apule nzvz-krm ncblo kx pna da kx trnzoliqtu. A' sa namrlzbx mz doa kx oliqtile nzvz-krmc, na-apule ncblo kx obq zvz x yrlqbzle lrpzde mz nzaenzli-krde nzvz-krm kztede. Nzmu naoliqtuq mzli kc navz-ngrmc, drtqm trnamyatrpwzu mz mz leplz, mz nzapu-krm ncblo kxyclq mz nzvzne-krde."

Baol Krarlimz Drtwr Ngrde Nzodatingr Da Kxkqlu

☆ **16:12** Asaea 11:15-16; Josua 3:13-17 ☆ **16:14-16** 2 King 23:29; Sekaraea 12:11; Matiu 24:43-44

17 Zbz enjrl krarlimz puliole baol scde mzlilxlr. X natq Gct vzpxm mz tron kc Mangr-nzangiongr, etumi nate nzrpi-krde kx, "Kapupxpe!"

18 X mzli lc bzlrpc tqpctipx x bzlrmei tqyr-putipx x nengq kxetu-esz'ngr aycnglrle nrlc atwrnrngr. Krlc nengq kx myatxpxpebz. Trgalr nengq kxetu kxmule lc abzo mzli kc tzwzng ncblo, krlzmlc mzli ka.

19 A' Gct trmrbrtru mz drtwrde alwx ngr leplz ngr taon kc etu tqapule Bxbilon kc bqnc. X ayrplapx-zlwzle nidr mz nzxplrkr zngya ngr drtwrde. Mz nzmu-krde lcde, taon kc etu glqwitxpx ncte tq, x taon mz nrlc tulvzo nzodat-ing amrlx. ☆

20 X mzli lcpwz trmctung x newzng amrlx nzmrbrlzmqng mz nengq kc etu.

21 X muli-aes kx etuting kz rlxom mz bongavz nztabqlr leplz. Nzmrlepu-lxblrkr ncte kxes' takitr kilo kx nzpnu-nzlvqn (50). A' leplz sc tzpibqti-zlwzlr Gct mz nzrlxo-krm muli-aes, murde nzayrplapx-krde trka-zlwzlbz badr. ☆

17

Nzycmne-ebzpxngr Srlx Kc Drtwr Ngrde Taon Kc Etu Rom

1 Mz nibrde, kzdq enjrl keng rlimz tzrngiscng baol keng rlimz, vzm bange x rpimle kx, "Navzki, murde na-aelwa-ngrbo bam nzayrplapxkr Gct taon kc etu tqapule Bxbilon kc bqnc. Taon lc tqyc mz mzlir lue kxkqlu. X lr taon lcng nzprszpxlr Yawe Gct angidr mz nzangio-krdr kx trngiu Gct

angidr. Nzapulr olvz kxyrlz kc tqprszpxle ncblo ngrde angidr mz nzrmwimi-abeane-krde ncblo kzbleng. ☆

² X king amrlx mz nrlc nzaxvctr-lzbqzbng mz alwx ngr nzrprszpxngr Gct angidr. X leplz amrlx ngr nrlc nzpxtxpx-kz-ngrdr Gct. Opxm kx nzalukurnrngr nzrmnqngr, mz nzaxvctr-lzbq-krbzlr kz badr king rdr.” ☆

³ Zbz mz zmatq ngr Mqngrkxtr, enjrl lc sc tqvzmitrpele ninge lzke. Mcx mrlcde olvz kc tqngi srlx, krlc taon kc etu tqapule Bxbilon. Olvz lc wxbuom mz Mrlx Kc Tqdrka'ngr kc kai, tqpctx, x narde rlimz, x dxpa' krde nznpu-esz'. X nrkrdrdqde nzyr-ngaleti drtq kx nznrlvzongr Gct.

⁴ X olvz lcde kq nzkg kxlqlwx x kala ngrde prpol x pc. X rlu kz da kx nzwzngz mz gol, prl x rplz kxlqlwxng. X malele kc kap kx nzwzngz mz gol, kx yrbulzm mz waen kxngangr x kxblqki kx vzpxm mz nzrtrngz-abeane-krde da kx myangr drtq mz nzangio-krde drka'. ☆

⁵ X mz rtrlmzte kz nzyrtr elr drtq kx drtwr ngrde yc kapq, rpile kx,

BxBILON KC ETU,
LXEDE SRLX AMRLX,
X NOU DA KXDRKA'NGR
X DA KXMYANGR DRTQ AMRLX MZ NRLC.

⁶ X mcx kx olvz lcde abrtz-zlwz-ngrde nznribqti-krde leplz kxnztr neng Gct, kcng

☆ **17:1** Jeremaea 51:13 ☆ **17:2** Asaea 23:17; Jeremaea 51:7

☆ **17:4** Jeremaea 51:7

tznibqti-ngrdr murde nzrpiwx-krdr Nrpa ngr Jiszs. Opxm kx olvz lc alukurnrngr nzrmnq-krde mepyr ngrdr. Kx mcx olvz lc pwrkilvctx-ngrne.

Drtwr Ngr Srlx Kc Tqngi Rom X Mrlx Kc Tqdrka'ngr Kc Kai

⁷ Zbz sc tqrpipem enjrl kc bange kx, “? Nike tqpwrkilvc-ngrn olvz lc? Olvz lc x Mrlx Kc Tqdrka'ngr tqvone-ngrde nzapulr nzymne-ebzpxngr. X sa nayokaetipxbo bam drtwr ngrde.

⁸ Mrlx Kc Tqdrka'ngr tqmcq, lu mzli kc kai, a' trlupeu mzli ka, x mzli trnaboju sa navzdmz mz gq kc trpnzng noude. X sa nao-zlile lrpzki kx vztr mz nzodatingr nide. Lr nrlc kcng drtqdr tryclzpuu mz Buk ngr Nzlungr, yzuo pnz mzli kc Gct tqwz-ngrde nrlc, sa naktipxlr Mrlx Kc Tqdrka'ngr tqllu mzli kc kai a' trlupeu mzli ka mz nyzylu-kr-mople. Murde mz drtwrdr krlc ngi rkx kxmatq.” ☆

⁹ X rpi-mop enjrl kc bange kx, “Drtwrm na-aotr-angidrbzme mz da kcng napibo bam mz nzkrly-krmleng mzli kc naprtz-ngrdr. Mrlx Kc Tqdrka'ngr narde rlimz. Narde lcng drtwr ngrdr newz nzrlimzng, newz ngr taon kc etu mrkc tqmncngr srlx kc.

¹⁰ X nar kcng rlimz drtwr ngrdr kz king rlimz kx na-acvelr taon nyzde lc etu. King lcng nzlvqn nzaclvepeng, x king kraesz'mz kc tqaclvele mzli ka. Zbz krarlimz sa na-acve-kzle taon kc etu kalr. X mzli kc navz-ngrmle, namncti-txpwzle mzli namrbcnepwz.

☆ **17:8** Daniel 7:7; Sam 69:8; 2 Tesalonika 2:3

¹¹ Kzdq king mz king lcng rlimz na-acive mou. Sa nanginide king krartq mz. Krlc Mrlx Kc Tqdrka'ngr tq lu kz kai, a' mzli ka trlupeu. X nao-zlile lrpzki kx vztr mz nzodatingr nide.

¹² “Dxpa' lcng nzpnu-esz', drtwr ngrdr king r mrkzbleng nzpnu-esz' kx trnzprtrkang mz nzaclvengr. A' king lcng sa narngiscng zmatq ngr nzaclve-krdr badr Mrlx Kc Tqdrka'ngr mzli kz navzm. X nzaclveti-tpwzlr mzli trnaboiu na-apupwzle nabz nepi kxesz'. ✧

¹³ X king lcng nzpnu-esz' drtwrdr sa naesz'ti x nakaobzlr nzxplr-krdr x zmatq ngrdr mz Mrlx Kc Tqdrka'ngr.

¹⁴ X sa nartwzng vea badr Nei Sip x leplz nedeng. Leplz nede lcng tqkqlleleng x tqmcpxleng x nzvz-nqblq-zvzlr nide. X Nei Sip lc sa na-aovxiole Mrlx Kc Tqdrka'ngr x king kcng, murde nide Kxetu r kxnetung amrlx, x King r king amrlx.”

¹⁵ Zbz rpi-mop enjrl kz bange kx, “Mcpeq lue kcng tzesotrpzng mrkc tqmncngr srlx kz. Lue lang drtwr ngrde leplz ngr natq x drtc' amrlx mz nrlc x zbo ngr leplz kxetu.

¹⁶ X king kcng nzpnu-esz' badr Mrlx Kc Tqdrka'ngr, sa natrkati nivz lrdr taon kz etu tqapule srlx kz. Sa nakatpxmlr mz taon lc da kxmrlzting kcng tqqlwx amrlx, mz nzapu-krde kx na-aycblqtxdr srlx kz. X sa na-atrkatitx-zlwzlr nide mz nzapu-krde kx nzngqdr ncvr drtqde, x na-ayrkrpxlr nide mz nzangc-krdrle mz nyr.

¹⁷ Na-alelr da lc murde Gct kx ryrlqtrpz drtwr mz nabzdr. Murde navz-nqblqlr me pnz

drtwrde, mz nzesz'tikr drtwr king keng nzpnu-esz', mz nzkao-krbzlr zmatq ngr nzaclvengr scdr mz Mrlx Kc Tqdrka'ngr. Murde na-aclveng navz navz mzli kx tutrngr natq Gct amrlx nzatutr-ngrdr.

¹⁸ “X olvz kc drtwr ngrde taon kc etu tqapule Bxbilon kc bqnc, kc tqaclve-zpwxle king amrlx mz nrlc.”

18

Gct Odatile 'Bxbilon' Kc Tqngi Taon Kc Etu Rom

¹ Mz nibr da lcng, mc-moux kc enjrl kx vzom Heven. Enjrl lc rngisc zmatq kxetu x nrlc yzlr-atwrnrngr mz zluli rde.

² X sc tqnemipele nzrpi-krde kx, “Bxbilon kc tqngi srlx kc etu, tzodatipe, eu nzodatipe. Taon kc etu mzli ka ngipe me nzmnc-ngrdr drka', drka' kzpetong, x da kxtrka amrlx kx nzlvcneng mz bongavz kx nzapulr palc x kqba. ✧

³ X lr taon kc nzprszpxpelr Gct angidr x nzangioldr kx trngiu Gct angidr. Nzapulr olvz kxyrlz kc tqprszpxle ncblo ngrde mz nzrmwimi-abeanekrde ncblo kzbleng. Leplz amrlx badr king rdr nzaxvctr-lzbqzbng mz alwx ngrde, mz nzapu-krdr ncblo keng tzrmnq-zlwzng. X ncblo kxnzatatrpqng trau mz nzamwa-krdr da mz nrlc, nidr benyr kxnzrngisc-zlwzng. Murde nzamwang da kx naesatpxngr drtwr leplz ngr taon lc, mz nzngini-krdr kxnzrkcmnz-zlwzng x kxnztrkibr-zlwzng.” ✧

✧ **18:2** Asaea 13:21; 21:9; 34:11-15; Jeremaea 50:39; 51:8, 37

✧ **18:3** Asaea 23:17; Jeremaea 51:7

⁴ Zbz, xlr-moux natq Gct Heven, rpile kx, “Leplz nengeng, dwaszpeamu lr taon lcng, ma tqaxvctr-lzbq-kzpzmu mz alwx ngrdrng, x ma tqprtr-kzamu mz nzayrplapxngr nidr. ✧

⁵ Murde alwx ngrdrng kqlu-esz'ngr, x nqmq krdr trtxpnzngr nzmrbtrtr-krde mz drtwrnge. ✧

⁶ Ayzlu-mopwzmu badr nikeng nzale-kaipzlr bamu. A' mz nzayzlu-krbzmuleng badr, nangi nqvi lxbler mz nikeng nzalepebzlr bamu. Nza-etqngr drtq kc tzkabzlr bamu nangi nqvi kz nzxplr-krde x kabzmu nzetqkr drtqdr. ✧

⁷ Leplz ngr taon kc, mz drtwrdr nzmyapx-esz'ngrng x trpnz-moungr kx apule nidr, x trpnzngr da kxtrka kx naprtzbz badr. Nzapulr srlx kc tqglqpx-lzbq mz nzrpi-krde kx, ‘Ninge Kwin mzli ka.’ A' nimu leplz nengeng, rtulrtr-ngrbzmu bade nzavzo-lzbq-krde. X srlx kc mz drtwrde abrtz zvz kz, mz nzrpi-krde kx, ‘Trnipc'u kxabzo kx yrni x drtwrde vz.’ A' kabzmu bade nzyrningr x nzvzkr drtwr.

⁸ Taon lc sa naodati mz nyr murde ninge Kxetu Gct kc tqrninr-esz'ngr sa na-ayrplapxx nide mz nzatrkatikr-krnge nide mz zyagox, nzyrningr, x dzbi mz zbq kx esz'txu. ✧

⁹ “King mz nrlic kcng tzprtrng badr mz alwx ngr nzprszpx-krdr Gct x alwx ngr nzrkcmzngr x nztrkibrngr, sa namclr zsikapu ngr nzngckr taon lc. X nayrni-ngrdr nzbz-krde, murde da kxmrlzt-ing kcng tzkcmnz-zlwz-ngrdr sc tzodatipeng.

✧ **18:4** Asaea 48:20; Jeremaea 50:8; 51:6, 9, 45 ✧ **18:5** Nou 18:20-21; Jeremaea 51:9 ✧ **18:6** Sam 137:8; Jeremaea 50:15, 29

✧ **18:8** Asaea 47:7-9

10 Sa natubzng rlrū mz nzmwxlrti-krdr nzaxvctr-lxblr-krbzlr mz nzodatingr taon kc. X narpilr kx, 'Rlr, rlr, nim taon kc etu tqapule Bxbilon kc bqnc, kc tqngi-bcnyrlr x matq. Nzodati-aningr nim apule bzlrpc kc tqpcpx.' " ✧

11 Zbz rpi mou Gct kx, "X kxnzamwang da sa nayrning x navzti drtwrdr nide, murde trpengr kx naxpebz da lcng tzamwatilr. ✧

12 Murde nzamwati-pnzng da kxkqlu lcde seleng: da kxnzlu nzwzngr mz gol, silvz, prl, x rplz kxlqlwxng, lrpz kxnzkqngr kxprki, kxprpol, kxpc x kx ngi silk. X nzamwati-kzng trprpa ngr nounc kx nzapulr nc bq, x da kx nzlz mz nounc kxlqlwx, bras, aian, rplz kxlq nzrpibz 'mabol' x mz nqngi elefant nzrpibz 'aevri.'

13 X nzamwati-kzng bqrlr nounc kx bletipxng, x tolo kx mnrte mrlz zlwz, x da kx na-amrlzle dakxnzng kx nzapulr ba x riya. X nzamwati-kzng dakxnzng kx nzapulr wit x flawa ngrde, waen, tolo ngr nra nounc olivi, x kzu, sip, hcsi, x sariot ngr vea. X nzamwati-kzng leplz kxnzawz-nrbalqng.

14 "Eke Bxbilon! Da kxmrlz kcng tqsutī drtwrm yrkrpxpebz, x da kcng tqngi-bcnyrlr-ngrn x nzobq-ngrbz tqmrlzvxiting mrbrtipeng. X trpengr nznngisc-krmleng.

15 Ncblo kcng tzaleng da tqangi-bcnyr-ngrdeng, sa natubzng rlrū mz zmwxlr, murde ma tzodati-kzng. Ncblo lcng sa nayrning x drtwrdr navz.

16 X narpilr kx, 'Rlr, rlr, nim taon kc etu, mzli kc kqq lrpz kxlqlwx x kxprpol x kxpctxpx scmqng.

X rluq kz da kx nzwzng mz gol, prl, x rplz kxlqlwx.

¹⁷ A' da lcng tqmrlz scmqng amrlx nzodati-aningr apule bzlrpc kc tqpcpx.'

"Mzli lc, kapten, kxnzwzng mz lcsu, kxnalil-vcmqng lcsu, x leplz kx nzmabzng prla amrlx, sa natutr-kzpqng rlr.

¹⁸⁻¹⁹ X mzli kc namc-ngdrdr nzvzdzkr zsikapu ngr nyr kc tqangle taon kc, sa nanemilr mz nzyrni-krdr nzrpi-krdr kx, 'Esa! Trpnz-moungr taon mz nrlc ka kx narsakrlrng ncd r taon kc etu. Rlr, rlr, taon kc etu! Lepz amrlx kcng tzrngiscng lcsu angi-bcnyrlr-ngrng mz dztumqng. A' nim la tzodati-anipe mzli ka tqapule bzlrpc kc tqpcpx.' X sa nakilvztilr nardr drtc' mz nzvzkr drtwrdr.

²⁰ Mz nzmukrde lcde, abrtzamu nimu lr Heven, nimu badr aposol, x profet, x leplz nengeng amrlx, murde odati-ngrne nide mz nikeng alebzlang bamu." ✧

²¹ Mz nibr nzymnekr Gct lc, kzdq enjrl kx xplr kalzmlc kc rplz kxmrlc, rtco-ngrde prla, x rpile kx, "Kxnamu nzodatingr taon lc etu delc, murde mzte nambrtx alo.

²² Trpengr natq gita, ncblei, x trpu, x trpengr nzngngr kx naxlrtr-kz-mopwz elr. Trpengr ncblo kx namabzng elr. X trpengr kx narbing kai elr.

²³ Bxbilon trpengr lam kx nayzlrpx-ngrm bam, x trpengr ncblo x olvi kx nayrlzpx-mop bam. Nzodatingr nim vzpxm mz ncblo nemqng, kxnze-tung kcng tznginidr bcnyrng mz nrlc. Murde

✧ **18:20** Lou Kcpwz 32:43; Jeremaea 51:48-64

nzesabrtilr leplz ngr mrkcng kqlu mz nzmrlzba-krdr dztumqng myaszpxle nzmrlzti-krdr Gct, apule kx rwitiq nidr dabo nem. ✧

²⁴ Eu Bxbilon, x nzodati-kzp murde ayrleq mepyr ngr profet x leplz kxnztrng ne Gct, badr mepyr ngr leplz neng Gct mrka mz nrlc kx nznibqting.” X krlc nzyrkrpxpekr nzayrplapx-rmnrkr Gct kcng rlimz.

19

Leplz Ngr Heven Nzglqpxlr Gct

¹ Mz nibr nzodatingr Bxbilon, xlrz nzmaloqr zbo ngr leplz kxetu Heven. Nzrpilr kx, “Awi Yawe! Naglqpxku Gct rgu kc tqngi nou nzl-apxng, tqrngiscde zluli x zmatq.

² *Murde drtwr kcng tqyrlqpeq rsakrlrngr x tubq zvz.* ✧ X ayrplapx-ngrde srlx kc nzrbatr-krbzle mz lr nrlc nzprszpx-krdr Gct angidr, x sc *tqayzlubzle bade mz nzvz-nqblq-krde nibqti-krde kxnzawz nedeng.* ✧

³ Awi Yawe! Naglqpxku Gct! Mzli ka taon kc tqvz-nqblqle nqm̄ kr srlx lc sc tqngcpe, x *zsikapu rde nzvzdz-krde la, tqvzpe tqvzpe.*” ✧

⁴ Zbz kxnzaclveng kcng nzpnu-li-nrade-pwx (24) x kxnzung kcng pwx nzyrngzong, x nzan-giolr Gct kc tqwxbuom mz tron, nzrpilr kx, “Delape! Awi Yawe! Naglqpxku Gct!”

✧ **18:23** Asaea 24:8; Jeremaea 7:34; 16:10; 25:10 ✧ **19:2** Sam 19:9 ✧ **19:2** Lou Kcpwz 32:43; 2 King 9:7; Sam 19:9; Asaea 34:10 ✧ **19:3** Asaea 34:10

⁵ Zbz kzdq natq vzpxm mz tron, rpile kx, “Glqpxamu Gct rgu, nimu amrlx kcng twztr-pzng bade x tzamrluelr nide, kxmule-esz' nimu ncblo kxnzeturng o ncblo txneng.” ✧

⁶ Zbz xlr-moux kc natq kx apule nzymnekatokr zbo ngr leplz, x apu-kzle nzyrlekr me talipx ngr lue, x apu-kzle nzyrpupxkr bzlrmei. Nzrpilr kx, “Awi Yawe! Naglqpxku Gct! Murde Kxetu Gct kc tqrninr, nide txpwz King r leplz amrlx. ✧

⁷ Drtwrgu naelalzm x na-abrtz-zlwzku, x naglqlzku Gct. Murde krlzpebzle mzli r nzyrlzkr Nei Sip. X olvz kxmnc-kamelr kc nayrlztile oliqtilzboqe.

⁸ Nzkapzbz bade nzkq-ngrde kc lrpz kxlqlwx kxprki x aglqpz'.” Olvz lc drtwr ngrde leplz kxnztrng ne Gct, x lrpz kxprki lc drtwr ngrde da kxtubq-esz'ngr kcng tzaleting.

⁹ Mrlz, rpi-mop enjrl kc bange kx, “Yro natq lcng. Sa namrlzbz mz leplz kcng tzaveating mz nzprtr-krdr mz nzyrlzkr Nei Sip. Zpwxtx! Krlcng natq Gct.” ✧

¹⁰ Zbz ninge kc tqrweopebo zpr mz enjrl lc, a' rpimle bange kx, “Bzkq! Angio txpwz Gct! Murde wztr-kzpo bade Gct, apu-kzx nim x kztemqng kcng tzabrtr-zvzbzlr drtwrdr mz Nrpa ngr Jiszsz Kxnmcpx. X nrpa lc tqngi nou da amrlx kcng tzpplxlr profet.”

Nzvz-krm Kraes

✧ 19:5 Sam 115:13 ✧ 19:6 Esikel 1:24; Sam 93:1; 97:1; 99:1

✧ 19:9 Matiu 22:2-3; Luk 14:15-24

11 Zbz obq-rmwible-moux, x mcx nzobqkr naonrx ngr Heven, x mcx kzdq hcsi kxprki. X Kraes kc tqwxbuom elr nzrpibz 'Kx brti drtwr' x 'Kx atutr zvx natqde.' Drtwr kcng tqyrlqpeq x nzrtwz-krde vea rsakrlrngr x tubq zvx. ✧

12 Mzte apule nqngi nyr, x narde lao-ngrm kraon kxkqlu. X nzyrtrpz kc bade drtq, a' nide txpwx kx rkrlz drtwr ngr drtq lc, x trpnz-moungr leplz kxrkriz kz. ✧

13 Mz nzm-krde lcde, drtqde nzrpibz Natq Gct. X nzqk kc tqkq-ngrde bxlzvlz zlvz mz mepyr.

14 X ami ngr leplz ne Gct nzvo-nqblqlr mz hcsi kxprking, x nzqk-lxblrng nzqk kxlqlwx kxprki x pnapr.

15 X ncblo kc tqrmailz lvcpxm mz naode kc toki r vea kxmalc kx naota-ngrde mz nzaovxio-krde lr drtqbrng amrlx. *X na-aclevele nidr mz zmatq kx xplr-esz'ngr na-apule bz kc tqrniglc botol.* ✧ X n-apusr-ngrde nidr nra grep kcng tqrnzbrtile, mz zngya ngr drtwr Gct kc tqrninr. ✧

16 X nzyrtr mz nzqk scde mrkc tqyc-zbztr dcdrade, drtq lcde sele:

KING R KING AMRLX
X KXETU R KXNZETUNG AMRLX.

Vea Kxetu

17 Mz nibrde mc-moux kc enjrl, tu mrkc tqrp-nakim nepi. X mz nate kxetu, sc tqkqlepele utc ngr wq amrlx, rpibzle kx, "Vzmamu x yrlwr-lxblramu mz nzmungr kxetu kc tqtrrngztibz Gct. ✧

✧ 19:11 Esikel 1:1; Sam 2:9; 96:13; Asaea 11:4 ✧ 19:12 Daniel 10:6 ✧ 19:15 Sam 2:9 ✧ 19:15 Asaea 63:3; Joel 3:13 ✧ 19:17 Esikel 39:17-20

¹⁸ Vzmamu x ngqnamu namz ngr leplz amrlx, kxmule-esz' king, kxnzetzung rdr ncblo ngr vea, ncblo ngr vea, kxnzawz-nrbalqng, kx drtqdr opx, kxnzetzung, leplz txneng, x kxnzvoneng mz hcsi badr hcsi nedrng.”

¹⁹ Zbz mc-moux Mrlx Kc Tqdrka'ngr kc kai badr king kxkqlu ngr nrlc ka x ami nedrng, nzata-lxblrtipx-lzbq-ngrdr nzota-krdr badr Kraes kc tqwxbuom mz hcsi lc, x ami nedeng.

²⁰ Zbz sc tzlolvzpelr Mrlx Kc Tqdrka'ngr tzad-watrng mz presin ncdr Profet Kxpokia, kc tqaletprz rxx mz mz Mrlx Kc Tqdrka'ngr. X mz rxx lcng, dekc tqesabrti-ngrde leplz kcng tztwzlr rxx ngr Mrlx Kc Tqdrka'ngr, x nzangioler mqn-grde. Mrlx Kc Tqdrka'ngr ncdr Profet kc Tqpokia, nzrtco-amrnangr mz Dxbu Nyr kx nzulrde rbq, x ngc mz rplz salzf. ☆

²¹ X ami nedrng nznibqting mz toki r vea kc tqlvcpxm mz nao ncblo kc tqvone mz hcsi. X utc amrlx nzmuti-krdr nelzdr krhc angidr mz nevrdr.

20

Yiz Siu-esz' (1,000)

¹ Mz nibr Kxnzmcpix nzaovxio-krde Mrlx Kc Tqdrka'ngr, obq-rmwible-moux, x mcx kc enjrl kx vzom Heven, malele ki ngr gq kc trpnzngr noude x sen kxetu kxmrlcpu.

² Enjrl lc aovxiole Mepwz kc etu, tizrpi-kzpz 'Nar Drka' x 'Setzn' kc tqngi kz ningidoe ngr nrlanc kc bqnc. X otibzle Mepwz lc, x bxtile sen kc, murde nayrbqtile yiz siu naesz' (1,000). ☆

³ X rtco-ngrde mz gq kc trpnzng noude. Apqbrobzle naonrx ngrde x amqngitxde, murde navz navz nakrlz-zpwxzbzle yiz kcng siu-esz' x tqesabrti-moupele lr drtqbrng kc ate. X mz nzvz-nqblq-krde me pnz drtwr Gct, mzli lc drtqde sa na-aopxbz mzli kxpi pz.

⁴ Zbz obq-rmwible-moux, x mcx kcng tron kxkqlu Heven, x nzwxbuopemqng elr kxnzrlxngiting amrlx murde nzaprcbz badr zmatq ngr nzacive-krdr badr Kxnzmcp x yiz siu-esz' (1,000). X mc-kzx mrlcde mqng krkcng tzlakitipxbz nardr, x krkcng amrlx tznibqng mz nzrpipx-krdr Nrpa ngr Jiszs x natq Gct, x krkcng trnzangiolru Mrlx Kc Tqdrka'ngr kc kai x mqngrde kxnz lz, x trnzyrtrpwzu r kx ngr Mrlx Kc Tqdrka'ngr mz rtrlr m ztr o mz mqdr. Krkcng tzrlxngiting amrlx nzlupe-moung mz nzacive-krdr badr Mevalu Kxnzmcp x. ☆

⁵ Leplz lcng tzlxngitilr Jiszs, nidr dalr nztulz-mou-ngrm kc kai. A' kxnzbnzng amrlx kcng trnzlxngitilru Jiszs, sa na-atulz-kz-mop Gct nidr mz nzbz-krdr mz nibr yiz kcng siu-esz'.

⁶ Sa namrlzbnz mz leplz kcng tqatulz-mopqng Gct mz nzbzngr kc kai, murde nidr leplz neng Gct. X trnartco-ngru nidr mz Dxbu Nyr kc tqngi nzbzngr kxrmnr-ngrm. X nidr kx nangi pris ne Gct ncd r Mevalu Kxnzmcp x, x na-acvetilr badr Mevalu yiz siu-esz'.

Nzaovxiongr Setzn

☆ **20:4** Daniel 7:9, 22; 1 Korint 6:2-3

⁷ Mz nibr yiz lcng siu-esz' (1,000), mzli kc tqatulz-mou-ngrm Gct kxnbzng amrlx kcng trnzlxngitilru Jiszs, Setzn sc tzavzpxpem mz presin.

⁸ X sa naprpx mz nzesabrti-mou-krde leplz mrkcng amrlx mz nrlc tulvzo. X sa navzmi-lxblrmqng Setzn mz nzvecngr, x nzkqlu-krdr na-apule drta' ngr prla. Sa na-apulr ngrlrvea kc drtqde Gog, badr lr Magog kcng tznzlvzo-zvzlr Gct. ✧

⁹ Sa namnc-ngalelr mzteadau kc tqmrlzti Gct mrkc tzmncngr leplz nedeng. A' nyr sa navzom Heven naodatile nidr.

¹⁰ Zbz Setzn kc tqesabrtile lr nrlc, sa nartcongr mz Dxbu Nyr kx nzulrde rbq x ngc mz rplz salzf. ✧

Dxbu kc tzrtcope-kaingr Mrlx Kc Tqdrka'ngr ncdr Profet kc Tqpokia. X sa na-aetq-zlwzbz drtqdr mz nrlckxngrlx x nrlckxbq, tqyc tqyc.

Nzrpipxng Kxrmnr-ngrm Mz Krkcng Tz-tubqng X Krkcng Tzvz-rbrng

¹¹ Zbz obq-rmwible-moux, x mcx Gct nzwxbuokrm mz tron kxetu kxprki. X opxm kx drtc' ncdr bongavz nzdwaszlr nide, x trnzmc-pnzung. ✧

¹²⁻¹³ X mc-kzx leplz amrlx kcng tzbzpeng, kxnbzng prla x kxnmncng mrnyz mqngr kxnbzpeng, leplz kxnzeting x leplz txneng. Leplz amrlx lcng nztutrpzng mrkc tqxlvrkipx tron. Zbz Buk ngr Nzlungr, mrkc tzyrongr drtq leplz kcng naptrng mz nzlungr kxboi, nzkawxpx. X kzdung kz buk nzkawxpx kz, kx nzpipxlr da amrlx kcng tqtrngztibz doa kxesz'

✧ **20:8** Esikel 38:2, 18 ✧ **20:10** Nzaelwapxng 9:17 ✧ **20:11** Daniel 7:9-10

mz nzmnc-krde. X Gct kc tqwxbuom mz tron sc tqayzlupe-ngrbzle da mz leplz mz nzvz-nqblq-krde buk lcng.

¹⁴ Trpengr kx rngisc zmatq ngr nznribqngr x nzatwzlrngr leplz mz mrnyz kxnzbpeng. Murde krkcng tznrgiscng zmatq lcng, nzrtctiope-ngrng mz Dxbu Nyr krkc tqngi nzbzngr kxrmnr-ngrm.

¹⁵ X krkcng drtqdr trnzyrou mz Buk ngr Nzlungr, nzrtco-ngrng mz Dxbu Nyr. X leplz lcng mrlc nzlakipx-lzbqpeng badr Gct, tqyc tqyc.

21

Bongavz Kxmrna X Drtc' Kxmrna

¹ Zbz obq-rmiwble-moux, x mcx kc bongavz kxmrna x drtc' kxmrna, kx trpnzng prla ngrde. Bongavz kc kai ncd r drtc' nzmrbpeng. ✧

² X mcx mzteadau kxtr, Jerusalem kxmrna, prpxpem Heven mrkc tqmncngr Gct, x sc tqv-zom. Mzteadau lc tqtr nzoliqtipe x mzte lngi, apule olvz kx nayrlz kc tzaoliq mz nzyrlz-krdr ncd r ncblo ngrde. ✧

³⁻⁴ X xlrx kc natq kxetu aepztr mz tron, rpile kx,

“Ma nyz Gct ycpebz mz krkcng

Nanginidr leplz nedeng.

Sa namncpeng badr.

X Gct esz'-krde sa nanginide Gct rdr.

Drlemztr amrlx sa naycpqpxbzle.

Trpengr kx drtwrde navz,

Kx nayrni, kx nabz,

Kx drtqde navetq.

Dalr mzli kc mrbrpe.” ☆

⁵ Zbz sc tqrpipem Gct kc tqwxbuom mz tron bange kx, “Yro natq lcng, murde da angidr lcng x sa natutrng. Mzli ka atubqtipe-moux da amrlx!

⁶ Eu, kapupxpe! Murde ninge nou da amrlx x kx ayrkrpx da amrlx, x ninge kz kx ryzutr da amrlx x kx nzamrbtrt mou. Sa naka-nrbalqbo mz leplz kcng drtwrdr tzbrlxkzng, lue kx yrlelzm mz vaulz ngr nzlungr kxmrna, murde nalu-moung. ☆

⁷ Sa nakabo da lcng mz leplz kcng tzaovxiong mz nzvec-krdr badr zmatqng kxtrka. X sa nanginibo Gct rdr, x sa nanginidr doa nengeng. ☆

⁸ A' krkcng tzmwxlrtilr nzbz-krdr mz nzvz-nqblq-krdr Jiszsz, nzesablqtilr nide, x nzprszpxlr nide mz nzangio-krdr gct kx trngiu Gct angidr, nzrnibqng, nzrmwiming doa kx trngiu krnalzdr, nzrngineting dabo, nzangiong mqngr drka' kxn-zlz, x nzpokiang. Leplz lcng sa nartco-ngrng mz Dxbu Nyr kc tqngc mz rplz salfz. ☆ Krlc nzbzng kxrmnrngr, x leplz lcng nzlakipx-lzbqmng bange, tqyc tqyc.”

Jerusalem Kxmrna

⁹ Enjrl kcng rlimz mzli kc nzkabz badr nzayr-plapxngr kx nzrmnr-ngrmqng rlimz. Zbz kzdq nidr vzm bange rpimle kx, “Vzm, murde na-aelwa-ngrbo bam Olvz r Nei Sip kc tqyrlz ate.”

☆ **21:3-4** Esikel 37:27; Livae 26:11-12; Asaea 25:8; 35:10; 65:19

☆ **21:6** Asaea 55:1; Jon 4:10 ☆ **21:7** 2 Samwel 7:14; Sam 89:26-27

☆ **21:8** Nzaelwapxngr 9:17

10 X enjrl kc sc tqvzmilzpele ninge, mz zmatq ngr Mqngrkxtr, mz kzdq newz kxetu x vdz wq. Sc tqaelwapx-ngrmle bange Jerusalem, mzteadau kxtr kc tqvzpxm mz Gct Heven. ✧

11 X zluli r Gct aglqpz'ngr Mzteadau lc apule rplz daemon kc tqqlwx-esz'ngr x nzopx-krde apule dzipq.

12 X ngrlelvz drkq kx xplr x vdz wq. X naonrx ngrde nznpu-esz'-nrade-li (12), naonrx keng taplxsr enjrl kxnzaclveng x nzataplxsr nzryrtrngr drtq neidu lr leplz ne Israel keng nznpu-esz'-nrade-li (12).

13 Naonrx tq lxblr mz nrlar Mzteadau kxes'. ✧

14 X nzwzng r drkq lcdeng mz nou rplz nznpu-esz'-nrade-li (12), x nzataplxsrngr nzryrtrngr drtq aposol neng Nei Sip.

15 Enjrl kc tqycmnem bange malele kc neni kx ngi gol kx nzanengr Mzteadau, naonrx ngrdeng, x drkq ngrde. ✧

16 Mzteadau trpnzng r nrlarde kxboi, a' kx namu-tpwzlr esz'. Enjrl kc anele mzteadau mz neni kc tqmalele, x krlzbzle stadia siu-nznpu-esz'-nrade-li (12,000), (kc tqngi kilomita siu-li-trtqki-pwx (2,400)). Nzboi-krde, nzetupx-krde x me krlzlbz drkq ngrde, kxnamu-tpwzlr esz'.

17 Enjrl kc ane-kzle nzvekr drkq ngr Mzteadau, x krlzbzle kubit trtqki-esz'-nznpu-pwx-nrade-pwx (144), (kc tqngi mita nznpu-esz'mz-nrade-esz'mz (66)), vzxpm mz noabx kc tqane-ngrde,

kc tqngi noabx sc leplz. *

¹⁸ Drkq ngrde nzwz esz'ngr mz rplz kxprki, x Mzteadau esz'-krde nzwz esz'ngr mz gol kxlq, x nznpr-krde apule dzpq. ✧

¹⁹ Nou rplz kcng mz drkq ngr Mzteadau nzmrlzng murde nzwzngz mz rplz kxlqlwx. Nou drkq kc kai rplz kxprki, krali rplz kxblutxpx apule nzopxkr bongavz mz nrlc kxngrlx, kratq rplz kxbx, krapwx rplz kxmgbq.

²⁰ X kranzlvqn rplz kxbotapz', kraesz'mz rplz kxpc, krarlimz rplz kxplctxpx, krartqmz rplz kxblu apule nzblukr bongavz, krarpwxmz rplz kxyzlo, kranzpnz rplz kxplc, kranzpnz-esz'-nrade-esz' rplz kxbla, x kranzpnz-esz'-nrade-li rplz kxprpol.

²¹ X naonrx kcng nznpu-esz'-nrade-li nzwzngz mz prl kxlqlwx amrlx. Naonrx esz' kc tzwzngz mz prl kxetu kx aglqpz' apule nelc, x lrpzki kxetu kc tqvz vau r Mzteadau nzwzngz mz gol, x nzlq-krde apule nzopxkr dzpq.

²² A' trpnzngz Mangr-nzangiongr kx mcx Mzteadau mrkc tqmnc-ngrbz Gct badr leplz nedeng. Murde Kxetu Gct kc tqrninr ncdz Nei Sip nzteqtrlr Mangr-nzangiongr mz nzangiongr nidz mz nrlc amrlx Mzteadau.

²³ X Mzteadau lc tryzlr-ngru mz zyzlr ngr nepi o temz, murde zluli r Gct ncdz Nei Sip, dela nangrlxpele nide. ✧

* **21:17** Mz ngalrde lcng, opxm kx nabz 12,000 x 144 nzymne-e-bzpx-ngzdr nabz 12. Murde nabz 12 vzm mz mzlir rlildr. 12 X 1,000 = 12,000. 12 X 12 = 144. Mz Nzryrnrkxtr, nabz 12 nzrpibz nabz ngr nzayrkrpxngr da. ✧ **21:18** Asaea 54:11-12 ✧ **21:23** Asaea 60:3, 11, 19-20

²⁴ X leplz kxntubqng mrkcng amrlx mz nrlc, sa navzneng mz zyzlr ngrde, mz nzvz-nqblq-krde me pnz drtwr Gct. X king amrlx mz nrlc kcng tztubqng kz sa naprtrpzng mz Mzteadau, mz nzrglqlz-krdr Gct ncdr Nei Sip.

²⁵ Mzli kc bqnc, naonrx ngr taon nzbq mz nrlckxbq. A' mz Mzteadau kxmrna, naonrx ngr-deng trtxpengr nzrbqpx-ngrng, murde trpnzng nrlckxbq mrlcde.

²⁶ X leplz lcng tztubqng sa naprtrpzng mz Mzteadau. X sa natwzlr dtudrng kxmrlzvxing kxlqlwxng.

²⁷ A' trtxpnzng da kx trtakitrdeu mz nzobqkr Gct kx naprtrpzng mz Mzteadau, x trpnzng leplz kx nzrtrngz-abeaneng da kx myangr drtq, x kxnpokiang. A' nangi txpwz krkcng drtqdr tzyrope mz Buk ngr Nzlungr sc Nei Sip, nidr lang kx naprtrng elr. ✧

22

Da Kxmrlzting Ngr Jerusalem Kxmrna

¹ Mz nibr nzmc-krnge Jerusalem kxmrna, aelwapx-kz-ngrm enjrl kc bange Lue ngr Nzlungr yrlelmz mz tron nyz Gct ncdr Nei Sip, x nzopx-krde apule dzpq. ✧

² Yrlekirole vau r lrpzki kc tqtavau Mzteadau, x nrlarde rlilrdr tungr Nounc ngr Nzlungr. X nzpa-krdr nzwrde nzpnu-esz'-nrade-li (12) mz yiz kxesz', nzwrde esz' mz temz kxesz'. X leu

✧ 21:27 Asaea 52:1; Esikel 44:9 ✧ 22:1 Esikel 47:1; Sekaraea 14:8

rdrng ngi dalr nzrkatxng 2yagox ngr nrkrdrdq
leplz kxntubqng ngr mztea amrlx. ✧

³ A' trpengr nzayrplapxng kc tqyrlq pnz Gct,
tqakipxle nide x leplz. A' Gct ncd 2 Nei Sip
nawxbuomqng mz tron nyzdr Mztheadau. X
kxnzawz nedrng amrlx na-angiolr nidr elr. ✧

⁴ Mzli kc trpnzng 2 doa kx mcle Gct. A' mzli lcpe
krkcng tzyrtrpz drdq Gct mz rtrlmztr, sc tzmctr-
atepebzlr mzte, x sc tzkrly-angidrpe-kzlr nide. ✧

⁵ Trpnzng 2 nrlyckxbq mrlcde, x trnzsutiu
drtdwrdr zyzlr ngr nepi o lam, murde Kxetu Gct sa
nayzlrpx-ngrbz badr. X leplz lcng sa nanginipe-
kzdr king x nzaclye-krdr tqvzpe tqvzpe. X da kx
mc-rmnr-ngrbo nide lape. ✧

Natq Enjrl X Natq Jisz

⁶ Zbz rpi-mop enjrl kc bange kx, "Natq lcng
da angidr x takitrde nzabrkitr drtdwr. X Kxetu
rgu, Gct kc tqkabzle Mqng 2de mz profet kcng
bqnc, atwzlr-ngrmle ninge nzaelwapx-krbo mz
kxnzawz nedeng amrlx da lcng tqycpe pipz
nzprtz-krdr."

⁷ Rpi 2 Jisz 2 bagu kx,

"Lalztq-angidr 2amu, murde mzli trnaboiu x
ninge kc tqyzlupe-mopwc'. X sa namrlz 2bz mz
doa kcng tzyrlq-angidrlr natq kcng tqkapx Gct
mz Buk lc, murde sa nakrlz-angidrlr da lcng
amrlx mzli kc tqycpe pipz nzprtz-krdr."

⁸ Ninge Jon. Xlrx x mcx da lcng amrlx
tqaelwa-ngrm enjrl kc bange. X kx yrkrpxbz

✧ 22:2 Esikel 47:12; Nou 2:9 ✧ 22:3 Sekaraea 14:11 ✧ 22:4
Nzrlaszng 33:20; 1 Timoti 6:16; Matiu 5:8; 1 Jon 3:2 ✧ 22:5
Asaea 60:19; Daniel 7:18

kc nzxlr-krnge x nzrmc-krnge da lcng, ninge kc tqrweopebo zpr bade mz nzangio-krngele.

⁹ A' rpi-mople bange kx, "Bzkq! Angio txpwz Gct! Murde wztr-kzpo mz Gct, da kc tqwaiamu badr profet x leplz amrlx kcng tzyrlq-angidrlr natq kcng tqyclzm mz Buk lc.

¹⁰ Bzkq yrlq-kapqq natq kcng tqpipx Gct mz Buk lc, murde ycpe pipz nzkaputr-krmqng.

¹¹ Mz nzmu-krde lcde, mzli r leplz nzteqtr-krdr nqm q krdrng sc tqyrkrpxpe. X mzli ka, kxnzvv-rbrng sa navz zvz mz nzvz-rbr-krdr, x kxdrka'-ngrng sa navz zvz nzale-krdr da kxdrka'ngr. A' kxnztrng sa navz zvz mz nztr-krdr, x kxnztubqng sa navz zvz nzale-krdr da kxtubq."

☆

¹² Rpi-mop Jiszs kx,

"Ninge Jiszs. Lalztq-angidrmamu, murde mzli trnzboi-krdeu x ninge kc tqyzlupe-mopwc'. X sa natwzmc da kx nayrlq-ngrbo mq leplz amrlx, navz-nqblqle nzvz-krdrng, kxmule-esz' kxmrlz o kxtrka." ☆

¹³ Ninge nou da amrlx x kx ayrkrpx da amrlx. X ninge kxrtwayz x kxrmnr-ngrbz. X ninge kz kx ryzutr da amrlx x kx amrbtrtx mou."

☆

¹⁴ Ninge Jon. Namrlzbx mz doa kcng lrpzdr tqprki mz nztapzo-krdrng mz mepyr ngr Jiszs, murde takitrde nidr nzprtr-krdr mz naonrx ngr Mzteadau x nzmu-krdr nra Nounc ngr Nzlungr.

☆

☆ **22:11** Daniel 12:10 ☆ **22:12** Asaea 40:10; 62:11; Sam 28:4; Jeremiae 17:10 ☆ **22:13** Asaea 44:6; 48:12 ☆ **22:14** Nou 2:9; 3:22

15 A' kzdung kz leplz kcng tzvz-nqblqlr nzmncngr kxtrka, trtxpnzngz nrvztr-krdr Mzteadau. Lepz kxnmulr seng: kxnzryzplengz-ngrng, kxnzrmwiming doa kx trngiu krnalzdr, kxnzrnibqng, kxnzangioldr mqngr drka' kxnzlv, x kxnzmrlybz badr nzpokia-zvzngz.

16 "Ninge Jisz. Ninge lc tqatwzlr-ngrbo enjrl nenge bamu mz nzipx-krbzle da lcng bamu, nimu kxnzrlxngiting mz makxtr kcng rlimz. Vzpx-angidrmc mz nqvi lr melrmqngz King Devet. X apux Paglxnrlc, mz nzaelwapx-krngz Zbq Kxmerna ngr Gct." ✧

17 Mqngzrkxtr ncdz R Nei Sip nzrpibzlr bade kx, "Vzm!" X nekeng amrlx nzxlrdr natqde narpi-kzlr kx, "Vzm, kx Kxetu Jisz!" Neke drtwrde brlxkz navzm, murde narmnq Lue ngr Nzlungz kx nzrka-nrbalq. ✧

Aclvetioamu!

18 Ninge Jon. Aclvetioamu nimu kcng tzxlrdr natq Gct kcng tqkapxle tqyclzm mz buk lc, murde namwxlrriamu. Murde doa kx ryrlqtr-mopwz kzdung natq kxnzpokianger mz natq kcng tqyclzpm mz buk lc, sa na-ayrplapx Gct mz nzayrplapxngz kxtrka kcng tqpipxpele mz buk lc. ✧

19 X doa kx katxpxle kzdung natq mz natq lcng tqkapx Gct tqyclzm mz buk lc, trpnzngz nzmncpx-krmlz Mzteadau kxtr, x trpnzngz

✧ **22:16** Asaea 11:1, 10; Luk 1:78; 2 Pita 1:19; 1 Jon 3:2 ✧ **22:17** Asaea 55:1 ✧ **22:18** Lou Kcpwz 4:2; 12:32

nzmu-krde nra Nounc ngr Nzlungr, mz nzkatx-pxkr Gct da kxmrlzting kcng tqycmnetrngr buk lc.

Vzm Kxetu Jiszs

²⁰ Jiszs kc tqycmnetr-ngrde da lcng amrlx rpile kx, “Da zpwxtx! Mzli trnzboi-krdeu x ninge kc tqyzlupe-mopwc'.” X kxnzrlxngiting amrlx nzrpibzlr bade kx, “Eu, angida! Vz-anim, kx Kxetu Jiszs!”

²¹ X ninge Jon krka'-ngrne kx Kxetu Jiszs naokatrle leplz kxnztrng nedeng amrlx mz zmrlz ngrde kxmyalz. Eu, angida!

Nzryrngrkxtr Kc Ate Rut x Sam
The New Testament plus Ruth and Psalms is the
Natügu language of the Solomon Islands
Buk Baibel long langguis Natqgu

copyright © 2008 Wycliffe Bible Translators, Inc.

Language: Natqgu (Natügu)

Translation by: SITAG

This translation is made available to you under the terms of the Creative Commons Attribution-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not make any derivative works that change any of the actual words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2017-11-17

PDF generated using Haiola and XeLaTeX on 18 Apr 2025 from source files dated 31 Aug 2023

fb2b7f06-e254-5fb7-b59d-ee21d5d7a93f